

552
L A

CHIRURGIE

MILITAIRE, TRESVTI-

LE A TOVS CHIRURGIENS:

& à tous ceux qui veulent suyure

vn Camp en temps de guerre:

pareillement à tous autres

en condition pestilen-

te ou dysen-

terique,

*Composée par M. Nicolas Goddin Docteur
en medecine en la ville d' Arras, Translatee
de Latin en François par M. Jaques Blondel,
Chirurgien à Lille.*

Avec vn recueil d'aucuns erreurs
des Chirurgiens vulgaires, adiousté
par ledit Goddin.

A LYON,

Par Benoist Rigaud.

1 5 7 0.

THE HISTORY OF THE

... ..

... ..

... ..

... ..

... ..

... ..

... ..

... ..

... ..

... ..

... ..



IAQVES · BLONDEL
CHIRVGIEN, AV ·
Lecteur Salut.



*I*cero au premier liure de
ses Offices nous demonstre
et enseigne, que ne devons
tant seulement pretendre
à nostre proufit particulier, mais que
sommes grandement tenuz et obligez,
d'auoir regard à la commodité et proufit
de noz parens, amis: et en general de
la Republique. Ce considerant, m'a sem-
blé estre bien decent et conuenable, de
traduire ce present liure de Latin en
Françoys; à raison qu'il peut apporter
grand bien, nō point seulement aux chie-
rurgiens (desquelz sont plusieurs igno-
rans la langue Latine) mais pareillement
aux payens, à cause que leur remede sera

plus esclarci & manifeste. Toutesfoi
aucuns pourroyët dire, qu'il n'estoit be
soin de ce faire, ueu que gës tant renom
mez en l'art de chirurgie, comme Iehan
de Vigo, & Ambroise Paré, en ont si am
plement escrit. Si est ce pourtant, que ce
ne m'a nullement distrait, considerant
qu'une matiere ardue & difficile, ne peut
estre trop examinee, & dilucidee. Aussy
iusques à maintenant nul n'a ainsi traité
de cest affaire comme nostre Goddin, c'est
à scauoir à part la pratique, & separés
mët la theorique. Parquoy, amy Lecteur,
ie te supplie uouloir tout prendre de
bonne part, & si la chose n'est si fidele
ment traduite, comme pourroyent
mieux faire ceux, lesquelz
sont en ce plus usitez,
de me uouloir
excuser.

CHIR



CHIRURGIE

MILITAIRE DE

M. NICOLAS

Goddin.



OMME ainsi soit,
que l'art de Medecine (comme recite
Hipocrates) soit de-
corée de trois grās
dons: c'est à sçauoir

de garder la santé des hommes, de
preseruer les corps des maladies fu-
tures, & de guerir les maladies pre-
sentes: certes nostre intention pre-
sente sera principalement de traiter
de la curation des maladies. Or pour
& à fin d'observer & tenir ordre cō-
uenable, & aussi plus cōmodément

instituer les lecteurs de ce petit liure:
 nous commencerons aux choses ge-
 nerales, en venant aux speciales:
 puis aux indiuidués, ou choses par-
 ticulieres: à ceste fin lors que le me-
 decin chirurgien, aura la certaine &
 seure cognoissance de l'essence de la
 maladie, il puisse par vraye & infalli-
 ble methode, prendre seures & cer-
 taines indicatiōs, tant generales que
 speciales, pour paruenir à la fin qu'il
 pretend: laquelle est la seure & par-
 faite curacion des maladies. Car (cō-
 me dit le Philosophe) en tout art ou
 science, tout est fait pour paruenir à
 vne bonne fin. Et celuy qui peut le
 mieux approcher d'icelle, est iugé le
 plus sçauant & parfait. Nous pouuōs
 donques bien dire que c'est vn don
 excellent de la bonté diuine, quand
 par vraye raison, iointe avec expe-
 rience, le chirurgien viét à restituer
 son

ysico. 2.

ethodi. 2.

son patient malade, à santé. Laquelle chose principalement est la fin & consommation de l'art de Medecine ou Chirurgie. Mais combien que les deux propres intentions du Chirurgien soiēt de guerir les maladies, & preseruer les hōmes d'icelles: toutefois icelle partie de l'art, laquelle guerist les maladies, d'autant qu'elle est plus ancienne, aussi est plus à estimer & louer. En suppliant donques la grace du seigneur Dieu, nous cōmencerons ce petit traité, & pour auoir plus clere & ample declaration & intelligence plus sommaire, nous cōmencerons à la diffinition de maladie, laquelle n'est autre chose qu'une affection contre nature, laquelle par soy & sans nul autre moyē empeche sensiblement les operations du corps: & est icelle maladie, ou affection de trois gēres, ou differēces. Premiere-

*Maladie**Artis
dicinalis*

ment en intéperature. Secondement
de morbo. en indeuë cōposition. Et tiercement
 I. en diuision, ou solutiō de cōtinuité.
 La premiere est propre aux parties
 simples. La deuxieme aux parties or-
 ganiques, ou cōposées. La troisieme
 est cōmune, tāt aux simples, qu'aux
 cōposées. Or l'affection, ou maladie
 dequoy auōs institué & deliberé de
 traiter, est vne solutiō de cōtinuité,
 faite d'vn trait à poudre, causant grā
 de cōtusion, petite & legiere combu-
 stion, intéperature chaude & seiche,
 & aussi quelque malignité indicible
 & occulte, procedante de la poudre.
 Avec icelle solutiō souuentefois ad-
 uient fracture d'os, & aux nerfs, &
 tendōs ruptiōs, que les Grecs appel-
 lent *spasmata*, les Latins, *conuulsiones*,
 & aussi grādes attritiōs & dilacera-
 tiōs d'autres parties solides. Parquoy
 aduient bié souuēt q̄ ces trois geres

de maladie dessusdites, se treuēt
facilemēt compliquez avec icelle so-
lution de cōtinuité. D'auantage sou-
uent y suruiēnent diuers& perilleux
accidens, cōme tumeur cōtre natu-
re, procedant de la defluxion des hu-
meurs, douleurs vehementes, fieures
agués & dangereuses, grand flux de
sang, & retractiōs de nerfs, lesquelz
accidens ne suruiennent sans grand
danger de mort. Toutefois la manie-
re & methode, par laquelle on pour-
ra presenter & alleger le patient des
dessusdits simpromes & accidés, se-
ra monstree, & declaree en la se cō-
de partie de ce petit traité. Car nous
auōs deliberé en ce present liure, de
traiter à part la theorique, & sepa-
rément la pratique: pour plus com-
modément & à moindre confusion
traiter yne partie & l'autre, comme
nous est tresbien demonsté par Ga-

Methodi lene, lumiere des Medecins, auquel
2. sommes grandement tenus, cōme à
 celuy duquel vient l'origine & pre-
 mier cōmencement de la vraye Me-
 thode, laquelle nous deduit & mene
 à la guerison des maladies. Il a vou-
 lu pareillement en grande diligence
 & fidelemēt esclarcir & dōner à en-
 tendre, ce que Hippocrates prince
 des medecins, nous auoit assez brie-
 uement & obscurément delaissé, de
 telle sorte qu'impossible est quelque
 maladie pouuoir subuenir au corps
 humain, d'autant que par industrie
 humaine elle se puisse guerir, que le
 vray & methodiq̃ Medecin ne puis-
 se facilement congnoistre & guerir.
 Or maintenant retournons à nostre
 propos delaissé, & parlons d'icelle
 presente maladie, laquelle ne peut
 nullement estre simple: car d'autant
 plus qu'en la partie lesée aura d'a-
 ctions

ſions ou vertus empeschées, cor-
 rompues ou abolies, d'autant eſt la
 maladie plus grieue. & plus d'agereu-
 ſe. Les cauſes d'icelle maladie ſont
 toujours exterieures ou primitiues,
 que les Grecs appellét *procatartiques*:
 toutesfois, combien que de ceſte
 cauſe externe, nulle indication cura-
 tiue ne ſe doie prendre, ſi eſt ce
 pourtant que la congnoiſſance d'i-
 celle prouffite grandement pour ſeu-
 rement paruenir à la fin pretendue,
 qui eſt la curation parfaite des ma-
 ladies: laſſelle choſes nous demonſtre
 euidentement Galéne, par l'exemple
 d'vn Serpent, lequel auoit mordu
 vn homme. D'iceluy ſerpent ne ſe
 prenoit aucune indication curati-
 ue, comme d'vne choſe, qui plus
 ne nuit, & on ne craind plus qu'el-
 le doie nuire: car de la diſpoſition
 delaiſſées, ſe prend ſeulement l'indi-
 cation

Methodi. 3

cation curatiue. Toutefois la congnoissance du serpent compete & profite beaucoup, pour la certaine congnoissance de l'essence du mal, mesmes est aussi du tout necessaire pour paruenir à la parfaite curation. Car autrement se guerit la morsure d'vn aspic, autrement d'vne vipere. Parquoy le prudent & aduisé Chirurgien se doit diligemment enquerir si la solution de continuité, de laquelle nous traittons à present, est causee d'vn boulet fort gros, ou moyen: ou si autrement auroit esté faite de petites pieces d'acier ou plomb, qu'on appelle ordinairement dragee ou semence, dequoy sont faites & causees fort dangereuses & mauuaises playes: car bien souuent sont detenues dedans la playe, apportant & causant griefz & perilleux accidés. Parquoy le chirurgien
ingeni

ingenieux & prudent, doit des le commencement fort diligemment cōsiderer, & du tout s'il est possible, estre assure, si le boulet est passé outre, ou s'il est demouré & detenu dedans la playe. Car s'il est detenu dedás, il est encores comme cause efficiente du mal, en irritant presentement la playe, en danger d'engendrer autre mal, lequel pourroit greuer d'avantage la partie affligee. Au surplus seroit tresprouffitabile au chirurgien, pour avoir plus ample cognoissance du mal, de scavoir comment la playe a esté faite: car sy le trait est sorti de l'engin directement, & avec grande impetuosité, il aura meurdry, cassé & dilaceré les parties solides, qu'il aura rencontré, & aussy demouré avec ledit trait quelque portion de poudre, laquelle d'autant que elle est encore actuellement chaude, elle

de, elle fait quelque legiere & petite combustion: & à cause de sa qualité chaude & seiche, elle induit vne intemperature en la partie affligee semblable à soy: c'est assauoir chaude & seiche avec vne malignité indicible, laquelle est aucunement venimeuse induite d'icelle poudre, tellement qu'elle se demaine de telle sorte par tous les vaisseaux, qu'elle corrompt & destruit les esprits & humiditez radicales du corps, & nullement, ou bien difficilement sçauoit on donner raison euidente & manifeste de la qualité mauuaise d'icelle poudre. Le cas pareil peult on veoir manifestement en la pierre lazules, & en plusieurs metaux, dont on ne sçauoit donner raison de leur qualité venimeuse, parquoy n'est merueille si en vne playe, en laquelle aura demouré quelque portiõ de ceste poudre,

dre, suruiuent des mauuais & dange-
 reux accidens. Or puis que i'ay ab-
 solument delibere & conclu de de-
 duire par vraye Methode la cura-
 tion de ceste maladie: il ne sera que
 bon & conuenable de donner à con-
 gnoistre, que c'est de Methode, *Methodos*
 laquelle n'est autre chose que vne
 voye vniuerselle, laquelle par vraye
 raison demonstre & enseigne la cu- *Methodi*
 ration des maladies. Et est aussi
 commune & familiere aux choses
 particulieres, c'est à dire, qu'elle
 instruit le Chirurgien à mettre à fin
 ses operations manuelles. Entoute
 vraye Methode, on doit premiere-
 ment commencer aux indications
 generales: puis deuenir aux noms
 generaux, & en apres aux specia-
 les, iusques à ce que le Chirurgien
 methodiç soit assure de la fin, à la-
 quelle il pretend. Pareillement toute
 methode:

methode se demaine par indicatiōs, mais les indications sont du tout separees d'experience. Parquoy est du tout cler & euident, que toute methode appartient à celle partie de l'art, que nous appellons theorique.

Indication
Methodi. 2 Indication n'est aultre chose que demonstration, ou insinuation raisonnable de ce que se doit faire. Au surplus la fin de toute methode & de toute indication n'est aultre chose, que chercher & trouuer propres & certains remedes, pour guarir les maladies : toutesfois combien que il y ait deux instrumēs, ou chemins pour pouuoir trouuer les artz ou sciences, cest à scauoir raison & experience : certes le vray methodique procedera par vraie raison, en delaisāt à part la simple experience, & se fierā du tout à l'experience, laquelle est fondee par vraye raison naturelle,

Car

Car la vraye methode demõstre certainement à celuy qui veult vrayement exercer la medicine, le droit chemin pour scauoir guarir les maladies, mesmes icelle methode à instruit & enseigne Galene, à inuenter & trouuer les remedes propres & idoines pour la guarisõ des maladies. Car deuant Galene, nulle personne ne sceut parfaitement, & comme appartient guarir vne pointure de nerfz, mais par experience, laquelle est fondee par vraye raison naturelle, il à sceu facilement trouuer les remedes conuenables par guarir icelles pointures de nerfz. Si est ce pour tant que le vray methodique obserue diligemment celle partie de l'art, que nous appellons empirique, mais seulement d'autat qu'elle cõcerne les operatiõs particulieres de l'art. Mais le fol & vray empirique guarist seu-

Methodi.
90.

lement les maladies par experience, tellement que lors, qu'il void la curation ne succeder à sa volonté, ne scait qu'il doit faire, ne comment il doit changer ses medicamens, pour paruenir à sa fin pretendue : parquoy est contraint de demourer en son erreur, & maniere de faire. Mais le vray methodique, lors qu'il void sa maladie rengreuer, incontinent il vient à considerer la cause, à sçauoir si elle vient de la partie du malade, ou de quelque mauuaise humeur de fluant en la partie, ou de l'indecente application des medicamens. Et ayant diligemment toutes ces choses dessusdites considere, il ordonnera conuenable & idoyne regime de viure: il defendra la defluxion des humeurs, & les destournera, & selon la qualité du mal changera ses medicamens. Parquoy, ami

Le &eur,

Le Lecteur, tu peux facilement considerer & cognoistre, que nostre propos^s adresse seulement aux vrayes methodiques & sectateurs de la doctrine d'Hyppocrates & Galene. Lesquelz ont voulu par vne vraye & certaine methode, raisonnablement poursuyure, & en la fin paruenir à la parfaite curation des maladies, & non à ceux qui ensuyuent Themison & Thessalus, auquelz la cognoissance & decours^{1.} des symptomes & accidés estoit seulement suffisante. Lesquelz pareillement guarissoyēt les hōmes en general, & nō en particulier, disans les canons vniuerselz de l'art, avec le discours des symptomes & accidās estre suffisans pour la curation des maladies. Or en laissant iceux empiriques, retournōs a nostre vraye methode, & parlons de la solution de

continuité, de laquelle nous traitōs à present laquelle ne peut nullemēt estre simple, mais faut qu'il y ait necessairemēt plusieurs maladies compliquees, avec lesquelles on ne scauroit donner le nombre, si ce n'est, qu'on ait bien trouuē les affections, par lesquelles les actions du corps sont blessées. Ou pour parler d'icelles affections ou maladies compliquees, presupposons que la premiere soit icelle place. La deuxiesme: ce qui de toute sa substance est contre nature, cōme le trait ou boulet, les grains ou semences, s'ilz sont encores detenus en la playe. La troysiesme sera la contusion. La quatriesme la petite & legiere combustion, laquelle à esté induite de la poudre, laquelle estoit encores actuellement chaude. La cinquiesme sera la malignité indicible, procedan.

*Le nombre
des affecti-
ons compli-
quees avec
la playe.*

dante de la poudre. La sixiesme, la profondeur, & cavité de la playe. La septiesme & derniere, sera l'intéperature chaude, laquelle est causée de la pouldre, laquelle est potentialement chaude. Icy auons nôbré sept affections contre nature, lesquelles sont tousiours compliquees avec la solution de continuité, sans autres accidens, que nous appellons acces-soires, qui ordinairement ensuiuent & suruiennent à vne playe : comme grand flux de sang, grieue douleur, tumeur contre nature, fieures, defaillement de cueur, & conuulsions, que les Grecz appellent *spasmes*. Lesquelz accidens, si par l'ayde de l'art sont deffenduz qu'ilz ne suruiennent en la partie, cela sera attribué à icelle partie de l'art, que nous appellons *prophylactice*, en Latin *præseruatiua*. Mais si iceux accidens sur

uenus en la partie, sont guaris, nous dirons ce estre fait, par le moyen de l'autre partie de l'art, que nous appellons curatrice. Toutesfois les remedes & moyens, par lesquels iceux accidens ne suruiennent en la maladie, & aussi par quelz aydes ilz se doyuent guarir, sera cleremét demonstré en la seconde partie de ce liure. Or maintenant venons aux indications curatiues, lesquelles doyuent tousiours estre correspondâtes en nombre, aux affections contre nature. Et pour auoir cognoissance de ce, il est bien requis d'auoir vn chirurgien ingenieux & methodique. Car les indications curatiues sont directement repugnantes aux affections contre nature, comme nous est tant de fois demonstré par Galene. Au surplus, iceluy chirurgien, doit diligemment considerer,

Methodi
4.

si la curation de la maladie est reguliere & ordinaire:ou si aucuns accidens n'empeschent l'ordre de la curation d'icelle maladie. Car en vne curarion ordinaire,riens ne se fait, que par vne ordre & maniere coustumiere. Mais lors q̄ les accidés viennent a puerir la vraye maniere, par laquelle on est coustumier de proceder en la curation de la maladie,ou que lesditz symptomes sont si grans, qu'ilz dominant au dessus de la maladie : alors la principale intention du chirurgien sera , de obuier & suruenir à iceux accidens, comme à la chose plus vrgente. Comme nous voyons ordinairement, qu'ilz ait requis, de prestemēt secourir aux flux de sang : & pareillement appaiser vne grande douleur , & remedier à vne cōuulsiō en delaisant l'intētiō que deurons auoir à la maladie , si

iceux accident n'eussent suruenus
 D'auantage, en toutes curations re-
 gulieres & ordinaires, la premiere
 indicatiõ se doit tousiours prendre
 de l'affection ou maladie, que nous
 pretendons guarir. Laquelle indi-
 cation est bien de petite efficace, &
 à vn chascun fort manifeste: car
 vn chascun sçait bien, tant soit il
 rustique, que l'affection que nous
 traittons, est vne affection contre
 nature, laquelle ne desire que gua-
 rison. Mais sçauoir par quelz moy-
 ens icelle maladie se peut guarir, il
 est bien requis au chirurgien, d'a-
 uoir cognoissance de la vraye me-
 thode, & estre bien vsté aux ope-
 rations de l'art. Et ce declaire bien
 manifestement Galene, quand il de-
 monstre, comment on est accoustu-
 mé fabriquer & faire vne nef. Il
 dit quil est notoire à vn chascun, que
 la

La premie
 re indica-
 tion.

la carina doit estre au fond, comme la plus forte partie : & que prora de coustume est situee au deuant en icelle : & puppis en la partie posterieure. Toutesfois, vn chascun ne scauroit faire la nauire comme il appartient, & est requis de faire. Parquoy celuy qui methodiquement fait ce que luy est demonstree par la premiere indication, peut estre appelle vrai medecin : mais d'autant que la curation de la playe, de laquelle nous traitons à present, ne se peut seulement prendre, à raison de la seule playe, pour ce que plusieurs, & diuers accidens sont complicez avec icelle. La premiere indication, laquelle est de grande consequence, & par le moyen de laquelle tout se fait, est delaissee en partie pour vn temps. Car en plusieurs complications, de dispositions contre nature,

*Methodi**Premiere indication*

faut proceder à la plus vrgente, pour paruenir à la vraye curation. Car en delaiſſant l'affectiõ plus vrgente : comme en vne ſolutiõ de continuité, s'il y a emorrhagie, grande douleur, & accidens ſemblables, on ne peut nullement paruenir a la curation de la ſolution de continuité; ſi premierement on n'a preuenu à icelle emorrhagie, & grande douleur &c. Et ce demonſtre parfaitement Galene, au troiſieſme de la methode, quand il dit, que la ou il y au-
Methodi ra pluſieurs affectiõs cõpliquees, le chirurgien doit auoir trois intetiõs. La premiere ſera prinſe de la choſe qui eſt cauſe de l'actiõ qui doit eſtre faite. La ſeconde ſera prinſe de la choſe, ſans laquelle ladiete actiõ ne peut eſtre faite. La troiſieſme de la choſe vrgente & accelerate. En de laiſſant donc icelles indications generales

nerales, adreffons nous aux autres. Car autre chose se demonstre par l'indication, laquelle se prend de la cause efficiente, de laquelle toute curation reguliere se commence: cōbien que proprement elle n'ait aucun effet cōme cause interne. Toutesfois ce qui est de toute la substāce cōtre nature delaissē en la playe, cōe le boulet & la poudre, sōt de mesme valeur, cōme si c'estoyent causes internes. Parquoy est assez demōstrē qu'il est du tout necessaire, les oster hors de la playe. Et pource faire sont auioud'huy inuētez plusieurs & diuers instrumens, propres pour oster & extraire cestuy boulet. Mais au cōtraire, la poudre est tellement adherēte aux parties dilacerees & meurtries, q̄ du tout ne se peut netoyer ne oster, si ce n'est que les parties cōtuses soyēt pareillemēt mūdifices & se

parces.

deuxie
indica-
n.

Methodi.

parees. Voila comment lors que les parties meurtries, sont separees & mōdifiées, que la poudre est pareillement ostee. La deuxieme sera celle qui se prend de la cōtusion, lequel le contusio aussi long temps, qu'elle est dedans la playe, demonstre d'estre separee. Et ce par le moyen des medicamens qui engendrent pus ou sanies, que les practiciens appellent *saniatiua* ou *suppuratiua*. Car cōme tesmoingne Hippocrates, il faut que toute playe faite par contusion, se putrefie. Et par ce moyen, la partie est plus assuree de phlegmon, & d'autres accidens qui pourroyent suruenir, & est necessaire que la chose ainsi aduienne, car la chair meurtre & dilacerée, est comme putrifiée, laquelle par le moyen des medicamens, se conuertist facilement en sanie. Et par ce moyen se purge la
playe

playe d'icelle contufi6, & autre nouvelle chair s'y engendre. Et iceux medicamens, que nous appellons *ſaniatiua*, & les Grecz *pyopœa*, ſont chaudes & humides, qui r6dent la chair contuſe plus molle, & comme toute putrif6e, c6me ſont pluſieurs graiſſes & axunges, aucuns mulcilla ges, le beurre & l'huile. Apres ceſte indication ſ'enſuit celle qui eſt prin ſe de la legiere combuſtion: laquelle d'autant qu'elle eſt petite, auſſi l'indication qui ſe deuroit prendre d'elle, ne doit eſtre de grande reputation: d'autant que apres auoir oſt6 la cauſe efficiente, & la contuſion cy deſſus mentionn6e, que la combuſtion ſe vient facilement à eſuanouir & diſſiper. En pourſuiuant noſtre matiere par ordre, nous parlerons apres ceſte petite & legiere indication, de celle la, qui eſt prinſe

*La troiſi
me indication.*

prinse de la malignité de la poudre : de laquelle ensuyuent bien souuent les plus pernicieux & mauuais accidens , que possible est suruenir en ceste maladie. Et d'autant que icelle malignité est vn symptome, suiuant la maladie , à raison de la poudre , aussi pareillement amaine & engendre avec soy , de tresmauuais accidens: comme fieure, defailement de cuer , palpitation, & tremblement de cuer , & corruption des espritz , & des humeurs. Toutesfois ne se peut nullement de monstrer , de quelles qualitez icelle malignité depende: combien qu'on cognoisse, qu'elle demande l'ablation d'elle , comme vne chose qui est contre nature. Laquelle chose se fera par certains remedes & aides, par nous en ceste affaire par longue experience esprouuez. Entre les autres,

tres, vn des principaux & plus certains, est cestuy de Galene, fait d'escruisses de riuieres, duquel ci apres môstreray la cõposition. Aussi pour obuier à ceste malignité, sont requises toutes choses, lesquelles de leur substance & propriété entretiennét & gardent la force & vertu du cueur: dequoy ferons cy apres mention. Parquoy n'est merueille, si ceste indication à bien souuent avec soy la totale action de la cure, veu & consideré, la consequence des mauuais accidens d'icelle. Apres ceste indication, parlons de celle là, qui est prinse de l'Intemperie chaude & seiche, procedante de la poudre. Laquelle intemperie, proprement est maladie des parties similaires, & s'oste & guarist par qualité cõtraire: c'est à sçauoir par medicamét refrigeratif. Ces choses
confi

considerés, il est bien requis d'auoir vn chirurgien bien expert & ingenieux, pour sçauoir de combien les parties affligées sont emprinses, de ceste intemperie chaude, a fin qu'il puisse mieux & par coniecture plus artificielle sçauoir, combien il sera besoing de refrigerer icelle partie. Nous appellons coniecture artificielle, celle qui approche plus pres de la verité. Car le medecin ne peut certainement sçauoir, de combien les parties affligées sont desbordées, ou desreiglees de leur bõne & naturelle temperature. Mais par icelle coniecture artificielle, il considere le plus qu'il peut, la verité. Parquoy est facile a veoir, cõme est requis grand iugement pour sçauoir appliquer chose contraire pour la guarison de la maladie. Car il ne souffit point a vne maladie chaude, d'appliquer choses

choses froides, si on ne les applique par deuë & certaine mesure, cōme la maladie le requiert. Car si vous refrigererez moins qu'il ne conuient, vous ne pourrez vaincre ne surmonter l'intemperie chaude : & si vous refrigererez trop, vous causerez vne autre maladie beaucoup plus grande. Comme nous auons veu en vn viel Rustre de guerre, aupres de Peronne, auquel suruint vn *erispelas* en la iambe. Iceluy psonnage estoit pensë & sollicité d'vn vieil Empirique, lequel luy fomentoit la iambe d'eau de morelle, & de meures, avec du camphre. De ceste maniere d'application, il sembloit au Chirurgien Empirique, l'espace de trois iours, auoit bien profité : mais non sçachant cōbien qu'il deuoit refrigerer la partie lesée : il continua tousiours ses mesmes medicamēs, par lesquels

la iambe fut tressort refrigerée : tellement qu'apres que la chaleur naturelle de la partie fut du tout estainte, la maladie se tourna en cancrene : puis apres en par faicte mortification, dont peu apres veismes le dict patient mourit. Plusieurs telles belles cures auons veu estre faites des Empiriques, lesquelz iournellement en tuent beaucoup, sans ce toutesfois, qu'ils en soyent reprins ou punis. Dont en deuiennent si glorieux, qu'ils se viennent espandre par tous quartiers, non sans grand mal & dettirement du peuple, & de la Republique, & grand deshonneur de la profession de Medecine. Ceste pratique ay voulu raconter, à fin que le Chirurgien Methodique, connoisse que ce n'est pas peu de chose quand il est question de venir à l'application des qualitez contraires, &

aussi

aussi afin qu'il congnoisse, que la
 temperature de la partie affligée a-
 uec la maladie, luy demōstre la mē-
 sure & portion de la cōtrariété. Car
 il faut entendre que la temperature
 naturelle des parties, en toute cura-
 tion de playes, obtient action de cau-
 se. Car impossible est guerir quel-
 que playe, si les parties subiectes ne
 sont en leur temperature naturelle.

Or poursuivant nostre propos, par-
 lons maintenant d'icelle indication,
 laquelle est prise de la profōndi-
 té de la playe. Laquelle profōndité
 n'est autre chose qu'une cauité bien
 grande, en laquelle s'engendrent des
 sinuositez, que les praticiens appel-
 lent cauernositez. Icelles affectiōns
 sont propres aux parties organiques
 c'est à sçauoir, en l'indecente &
 mauuaise composition & figure des
 parties affligées & lesquelles choses

*La sixième
 indication*

Method.

prouiennent de la perdition de quelq
partie solide. Pareillemēt icelles cau
tez ou profonditez sont des propres
différences de la playe, cōme largeur
& rotūdité, grādeur, & petitesse: car
les différences des playes, se prennent
principalement des choses qui ad
uiennent & occupent le lieu blessé:
donc icelle indication prinse de la
profondité de la playe, nous demon
stre euidemment la repletion d'icel
le, & reparation des parties deper
dues. Laquelle repletiō declare aux
Chirurgiens, quels medicamēs sont
propres, pour la restauration & re
pletion d'icelles cautez. Car en tou
tes playes caues, il nous est par elles
mesmes significé, qu'icelle chair qui
est deperdue, doit estre restauree.
Or est il tout notoire, que la matiere
& substance de la chair, qui se doit
engendrer, doit prouenir d'vn sang
louab

Methodi. 3

louable, lequel ne soit pecheant en qualité, n'en quantité. D'avantage, est à sçavoir, que nature seule, est celle, qui fait icelle generation de chair, par le moyen du sang dessusdit. Parquoy nous pouons raisonnablement dire, que nous n'auons nulz medicamens sarcotiques: c'est à dire generatifz de chair, mais seulement font par accident dit telz, à cause que sans aucune erosion, ilz viennent à deseicher & nettoyer l'humidité, empeschante l'œuvre de nature. Car du nourrissement idoyne & propre pour la generation de la chair, prouiennent deux excremés, L'un subtil, que les Grecz appellent *ycor*. Les Latins, *sanies*. L'autre n'est si subtil, mais plus espes, que les Grecs appellent *pus*, les Latins *sordes*. wbes.

Du premier excrement subtil, la playe en est faicte humide: de l'au-

tre excrement, qui est espes, elle en est faite sordide. Parquoy toute playe laquelle requiert quelque repletion, desite medicament, ayant double qualité ou vertu. Car la plaie d'autant qu'elle est humide, demande desiccation, & d'autant qu'elle est sordide, requiert absterfion. Pareillement, d'autant que aucune playe est plus profonde, d'autât à elle à faire de medicamens plus deterfifz, & aussy de substance plus liquide: à fin que le medicamēt paruienne mieux au fond de la playe. Et pour ce faire, plus commodément, est requis d'auoir vraye congnoissance de la figure & situation de la partie. Et à fin de mieux entendre ceste indication, il faut que le Chirurgien ait certaine congnoissance de la nature de la partie: & que par vn iugement seur & aduisé, il entende par quel moyen icel

scelles sinuositez se doiuent remplir. Car si le médicament liquide, qui est ietté dedans la playe caue, ou sinueuse, est trop deter sif, il esmouuera douleur, & causera que la cavitè deuiendra plus profonde. Et au contraire, s'ils sont peu deter sifz, ilz rendront la playe plus sordide. Au surplus, il est requis au Chirurgien d'auoir la congnoissance de la qualité & temperature, d'vne chacune particule. Car aux natures & parties plus humides, il est besoin de medicamens moins desiccatifz, & aux parties plus seiches, plus desiccatifz. Comment est il donc possible, que le Chirurgien, s'il n'est bien institué & vité en la vraye Methode, puisse congnoistre, que l'encens en aucune nature engendre chair, & aux autres sanie ou sordes? Car les corps tendres & delicatz, cōme des

petis enfans & femmes oyfeuses, ne peuvent endurer medicamés si forts & violents, comme les corps durs & robustes. Parquoy est en ce reprints & congneuë l'inspience de Thesalus, & Themison, lesquelz, comme dit est, se contentoyent de la congnissance commune, & non particuliere. Comme il est requis à vn Chirurgien Methodique, de cõgnoistre, à fin de plus decentement appliquer ses medicamés, selon ce que la diuersité des corps le requierent, & de poursuiuir ses intentions curatiues, iusqu'à ce, qu'il soit paruenu à la fin pretendue & requise. Mais si d'auéture en icelle playe la chair est creuë plus que de raison, c'est vne affection contraire à la precedente, que les Grecs appellēt *hypersarcosis*, laquelle desire estre ostée de la partie malade : & ce se fait par l'œuure de

Hypersar-
cosis.

de

des médicamens, & non de nature. Et ces médicamens lesquelz repriment & ostent icelle chair supercrescente, faut qu'ilz soyent de grande dessiccation, & forte detersion, à fin qu'ils puissent oster & demolir ce qui est creu & survenu contre nature. Or maintenât presupposons icelles indications predites estre accomplies, & que la playe soit remplie de chair, & qu'il reste seulement à cicatrifer icelle playe, laquelle cicatrice induite, fera fin & accomplissement de la cure. La cicatrice, est comme du tout semblable à la peau, laquelle se fait & induit par la faculté & vertu des médicamens : lesquelz médicamens sont beaucoup plus dessiccatifs, que les agglutinatifs, ou generatifs de chair, que les Grecz appellent *sarcotiques*. Car les *sarcotiques* ne passent point le premier de-

Methodi.

gré en siccité, mais les agglutinatifz (lesquelz s'appliquent seulement aux playes simples & recentes) doiuent estre vn peu plus desiccatifz, que les sarcotiques, afin de pouuoir consumer & deslecher l'humidité naturelle, laquelle se treuve en la playe, & aussi d'auantage les epulotiques: c'est à dire, les cicatrisatifz viennent de telle sorte condenser & espessir la peau, qu'ilz produisent vne mébrane, comme du tout semblable à la peau: tellement que iceux medicamens epulotiques, sont si conformes aux medicamens qui ostent la chair excrescente, que iceux medicaments ostans la chair supererescente, mise en petite quantité, peuvent deüement causer vne cicatrice: comme *nisi* & *calchites*, si elles sont bien lauces & remises à douceur. Il y a pareillement des medicamens

eamens, lesquels n'ont nulle erosion, toutesfois sont de grande desiccation, & iceux proprement sont epulotiques: c'est a dire, cicatrifatifz, cōme les os de Mirabolans mis en poudre, les escorces de Grenades *minium* laué, *anethum* bruslé, *pompulix* lauce, & plusieurs autres metaux. Et alors que tu auras cicatrisé ta playe, & seras du tout seurement parvenu à ta fin pretendue: remercie le Createur, lequel t'a voulu donner ceste raison & congnoissance, de la vraye Methode, par laquelle tu es parvenu à ta fin pretendue.

Il reste maintenant à parler d'iceux accidens, lesquels auons icy dessus appellé *accessaires*, lesquels en partie sont comme maladies, ou affections nouvelles, & en partie comme symptomes, ou accidents. Or nous parlerons du flux de sang (que les

Des accidens accessaires.

Le premier accident accessaire.

les Grecz appellent *hemorrhagie*) lequel ne survient jamais à vne playe, si aucuns grans vaisseaux, comme veines : ou arteres, ne sont diuisez, ou rompus. Et entre les autres, iceux vaisseaux, qui sont au milieu de la cuisse, & les iugulaires sont fort perilleux. Et aussi sont pareillement iceux flux de sang, lesquels procedent des parties internes du corps. Or est notoire, qu'iceluy flux de sang, est symptome & accident, de la solution de continuité, lequel flux de sang facilement cessera, si on vient à remedier à la cause dont il procede. Ce que se peut faire en

Diuersion.

1591

deux manieres : c'est à sçauoir, en diuertissant le sang fluant en icelle partie, par les veines communes & familiares, au membre affligé, à l'autre partie opposite, & en serrant le vaisseau, lequel est diuisé, ou en rete-

nant le sang, qui induit comme vne callosité sur la veine. Pour la curation d'icelle affection, sont fort propres, bonnes ligatures, deuë conionction des labies de la playe, & application des medicamens astringens, desquelz ferons mention en la seconde partie de ce traité. Mais lors que le flux de sang prouient du dedans du corps, alors la ligature, ne l'application des medicamens, ne peut prouffiter: mais faut secourir par reuulsion, que les Grecz appellent *antispasts*, ou par deriuation en Grec *parochetensis*, & faut qu'icelle reuulsion se face tousiours par icelles veines, lesquelles directement viennent correspondre à la partie affligée. Comme si la iambe droite est blessée, tu ouvriras la basilique dextre: & si le bras est affligé, tu ouvriras la veine dite *vena poplitea*, qui
est

est deffouz le genou, du costé meſme, ou de la cheuille. Pareillement ſi le col, ou l'eſpaule du droit costé est bleſſee, tu feras ouuerture de la Cephalique, du meſme costé. Apres la reuulſion eſtre deuément faiçte, ne ſera encores que bien faiçt, d'oſter du ſang des parties voyſines: c'eſt à ſçauoir, avec aucunes ventoles, qu'on pourroit appliquer à l'environ de la playe. Au ſurplus, il eſt bien requis & neceſſaire, d'vſer de viandes & boire, qui puiſſent refrigeter & engroſſir le ſang, & d'vſer de medicaments aſtringens: deſquelz parlerons plus amplement cy apres. Et auſſi par le moyen de la reuulſion & deriuation aux parties voyſines, tu defendras que aucune tumeur ne ſuruienne à la playe: & auſſi en vſant de medicaments repercuſſifz & confortatifz

tifz de la partie, en appaisant la douleur : en ôstant la chaleur estrange : & en purgeant le corps de ses mauvaises humeurs, si besoing est. Pareillemét les convulsions sont aucunes fois prohibées, par l'applicatiõ d'aucuns medicaments, & remedes propres à ce, sur les aisnes, soubz les aisselles, & au col. Et certes si par le moyen de ceste partie de l'art, que nous appellons *prophylactice*, tu viés à defendre qu'iceux accidents ne surviennent : ce te sera grand honneur vers le peuple, & l'vtilité demourera au patient. Mais si les dessusdictz accidents ne peuvent nullement estre defenduz, par les moyens predictz, ou par l'indeuõ application d'iceux, ou le mauvais regime du patient, ou par l'ignorance du Chirurgien, iceux accidents soyent suruenuz, lors est question

de

de les oster & guerir, comme chose
 contre nature, comme ainsi soit au-
 si, que toutes tumeurs viennent de
 la de fluxion des humeurs. L'indica-
 tion curatiue donc d'icelles tumeurs
 sera euacuation : & aussi nullement
 ne se peut guerir la playe, si la tu-
 meur n'est ostee. La matiere de guerir
 icelles tumeurs, est tresbien trait-
 tee par Galene, au second *ad Glau-*
conem, & aux deux derniers liures
 de sa Methode. Pareillement auez
 vous au premier *ad Glauconem*, &
 au neufuime de la Methode, la cu-
 ration des fieures, parquoy nous
 nous deporterons d'en parler. Mais
 le Chirurgien soit seulement adui-
 sé, de mener avec luy vn Medecin
 docte & suffisant, pour suruenir à
 icelles fieures. Lors que les con-
 uulsions commencent, elles ont
 de coustume de suruenir premiere-

ment

ment aux parties , lesquelles sont plus directes à la partie affligée , ou malade. Car alors que le cerueau se sent lesé, incontinent icelle conuulsion s'espard par tout le corps: mais icelle conuulsion laquelle est produite de mauuaises humeurs, abscuree dedans la substance du nerf, requiert du tout euacuation d'elle. L'euacuation se peut faire , comme auons dit cy dessus par reuulsion & vnctions idoines & conuenables. Mais iceluy spasme, qui est fait par le moyen d'une inflammation communiquées des parties nerueuses blessées, ou trenchees , ou non blessées, est appellé des praticiens *spasmus proportionatus ad materiam*. Mais à la conuulsion qui est faite seulement de la malice de quelque venin , ou de quelque grande douleur , est requis de faire euacuation :

D

de ceste matiere venimeuse, & defendre qu'elle ne vienne au cerueau: & icelle conuulsion est appellee *spasmus non proportionatus ad materiam*. D'auantage s'il suruient grande douleur a la playe, tu consideras la cause d'icelle: car elle suruient tousiours de la solution de cōtinuité, ou de soudaine alteration, ou de toutes deux jointes ensemble. L'intemperie ou l'alteration des qualitez de la partie, sont ostees par qualitez contraires, mais la solution de cōtinuité, est repacee par le moyen de l'vniōn des parties separees & diuisees, Et aussi coustumiere mēt quād pointure & ruptiō est aduenue a quelque nerf, alors sont causees de grandes & terribles douleurs: tellement que souuentesfoys sōmes cōstraintz de couper le nerf transuersalement, & alors ilz ne causent

sent plus nulles douleurs. Aussi en les coupant transuérſalement vous preſeruez voſtre patient de la mort, en delaiſſant ſeulement la partie debile. D'auanture ſ'il y auoit quelque humeur qui vint a remplir & eſtendre le nerf : alors il eſt queſtion de le reſoudre par medicamēts reſolutifz , comme nous dirons cy apres. Par telz moyens au commencement des conuulſions, en auons pluſieurs guari & allegez : mais quand elles eſtoient eſparſes auant toute la ſubſtance du nerf venant iuſques a leur principe , ilz mourroyent tous avec grande douleur. Au ſurplus ſi les os ſont rompuz & cōminuez en diuerſes pieces , comme il aduient ſouuēt en ceſte maladie : il eſt neceſſaire que entre icelles pieces & fruſtules , il ſi engendre ſanies, & alors icelles pieces rōpues & concallees, ſe doiuent

ingenieusement avec propres instrumens tirer hors, car par la longue retention d'icelles, se pourroit facilement esmouuoir vn spasme. Lors que les cheuz & boutz des os sont separez, tu couperas les ligamens, & attireras iceux os au dehors. Pareillement quand la pellicule ou membrane courante l'os, retient quelque petite piece d'os, il la faut couper, puis tirer iceluy os au dehors. Si d'auanture quelque partie du corps estoit emportee par le moyen de quelque gros boulet, & que l'os descouuert fut demouré inequal: ceste inequalité doit estre ostee avec vne serre ou sie, assez haut, afin que en apres que la chair qui se doit rengendrer, puisse produire vne forte & dure cicatrice. Mais si le *cranium* est blessé, ou vulneré du coup, ilz sont le plus souuent renduz tout estoa.

estonnez : si est ce que nous auons
veu souuent le *cranium* estre blessé,
sans ce que la playe fut penetrante.
Et aussi faut scauoir, que les playes
faites aux costez de la teste, sont be-
aucoup plus perilleuses, que celles
qui se font en la partie superieure:
car des costez s'õt produits plusieurs
nerfz: mais de la partie superieure,
nulz. La solution de continuité aux
os, demande vnion des parties sepa-
rees : mais en icelles playes, à cause
que les os sont du tout comminuez
& cassez, la solution ne se peut si in-
continent vnir, mais est premier re-
quis par instrumens idoines, les ti-
rer dehors, & en apres poursuyuir
les indicatiõs, comme est dit dessus.
Nous ferons icy, amy Lecteur, fin
des indications, lesquelles se doiuent
prendre des accidens, que nous ap-
pellons accessoires, qui te proufite-

ront fort, pour paruenir à ta fin pretendue.

Des Pronostiques.



Celle partie de medicine que nous appellons significatiue, cōsiste en l'obseruatiō des signes, laquelle contient en soy la cognoissance des choses passees, & la consideration des choses presentes, & le Pronostique & aduertance des choses à aduenir. Par quoy au moyen de ceste partie de l'art, le vray Methodique peult acquerir grand bruit, & honneur, moyennant qu'il soit prudent & aduisé, touchant le pronostique des choses futures : tellement que si possible n'est que par son industrie & artifice, il ne puisse vn chascun mettre à lanté, il euite le scandale du peuple, en predi

en prédisant ce qu'il en deuoit aduenir : d'auantage en considerant par meur & deliberé iugement, les accidens qui pourroyent aduenir, il peut solliciter par sa prudence, que iceux accidens qui pourroyent aduenir, ne suruiendront point : comme le prudent marinier, quand il apperçoit que la tempeste se doit esleuer, incontinent il vient a proueoit à toutes ses choses qui luy sont requises & necessaires, pour garder & preseruer icel le nauire. Pareillement quand le chirurgien methodique void quelque playe en aucun membre, incontinent il considerera les accidés qui pourroyent suruenir, & lors par aydes idoynes & propres empechera, que quelque conuulsion, ne autres accidens n'y suruiendront. Et est à noter, que la vraye certitude de

bien pronostiquer à vn chacun chirurgien methodique (apres auoir cogneu l'essence de la maladie ; & les accidens d'icelle) consiste principalement en ayant consideration de la dignité de la partie affligee, & icelle dignité est cogneuë par l'Action que la partie affligee doit naturellement faire. Or entre toutes les particules du corps humain, tant similiaires, q̄ composees, il en y a plusieurs necessaires pour la cōseruatiō de la vie, lesquelles nul ne peut cognoistre, s'il n'est bien instruit en l'anatomie du corps humain. Et d'icelles playes lesquelles n'ont point de peril ne de danger en elles : & de celles qui sont pernicieuses du tout, il est facil à en pronostiquer. Mais de celles lesquelles ont aucū moyen entre ces deux là, il n'est point facil d'en faire certain pronostique, ne
de la

*Il faut
conuient
la science
de bien pro
gnostiquer.*

de la mort, ne de santé. Car alors il est requis d'auoir vn chirurgien bien prudent, qui sçache diligemment considerer, asçauoir, si la playe est plus inclinè à mort, que a guarison : ou de receuoir quelques mauuais & dangereux accidens. Et apres auoir bien curieusement consideré les choses dessusdites, on peut bien dire par coniecture artificielle, ce qui semble qu'il en peut aduenir: & par ce moyen, le chirurgien maintiendra sa profession en honneur, en augmentant pareillement le sien. Et a fin que delaissons les parties nobles, lesquelles quand elles sont blessées, ne sont sans grand danger de mort, pour mieux dilucider nostre petit traité, & donner a entendre aux lecteurs d'iceluy, nous les declairerons. Premiere

mét toutes les parties principales, &

icelles lesquelles immediatement les seruent, & aussi celles qui sont fort prochaines ausdites parties principales & nobles, si elles sont blessées du trait, necessairement causent la mort, & en general toutes icelles parties, lesquelles sont contenues en la poitrine, & pareillement au ventre inferieur. Et icelles aussi qui sont contenues au *CRANIUM*, causent & amènent la mort, si elles sont blessées du trait. Toutesfoys iceux ausquelles les gros intestins & la partie charneuse du diaphragme sont blessées, ne doiuent estre du tout delaissees, qu'on ne leur face tout ce qui est requis, & ce que l'art commande. Et pareillement les parties externes, comme les arteres carotides, & veines sphagitides, qu'on appelle vulgairement *originales*, qui sont au col; & iceux grans vaisseaux, lesquels

lesquelz sont espars au milieu de la cuisse, sont de fort grand peril & danger : à cause du grand flux de sang qui en prouuiet. Aussi icelles playes lesquelles sont faites en parties solides & nerueuses, ne sont point sans peril ne danger. Car icelles playes sont coustumieremēt de mauuaise morigeration, dont peuvent soudre mauuais accidens, comme conuulsion, & la mort. mais icelles qui sont faites seulemēt es parties charneuses, sont moins dāgereuses. Combien qu'elles soyent profondes, si est ce pourtant, que quand le chef des muscles sont meurtris & lac:rez, aucunesfois peuvent causer spasmes: aussi pareillement les playes profondes, causent le plus souuent cauernositez & sinuositez, lesquelles sont cause de la prolongation de la cure. D'auantagē

No: 4.

tage d'iceux accidens que nous auons appellé accessoires ; qui suyuent la maladie, se peut aussi faire pronostique. Car fieures fortes, vuides, de faillemēt de cueur, & conuulsions, ne suruiennent point sans grand danger & peril. Et est à noter que nous auōs veu souuēt ceux qui mourroyēt d'icelles playes, vn iour ou deux deuant la mort, qu'ilz laissoyent quelque portion de sang par les narilles, ou par la bouche, ou par le fondemēt : & iceluy flux de sang ne procedoit d'autre cause, que de la malignité de la poudre, laquelle auoit infecte & corrompu iceluy sang. Or quand aucunes parties organiques, comme bras, cuisses, ou iābes, sont blessées, c'est grand hōneur au chirurgien, si en guarissant sont patient, il garde & preserue que la partie ne soit affollee, & priuees de son
office

office & action: ou si l'action d'icelle partie doit estre plus foible, ou du tout deperdue, de le predire aux amis, ou aux assistans: car ordinairement, les amis sont coustumiers de demander d'icelles affaires au chirurgien, & n'est certainement possible en asseurer iceux amis & assistans, si le chirurgien n'a la parfaite cognoissance de la composition, action, & vtilité d'une chascune partie. La composition & action peut il scauoir des anatomistes: & l'vtilité en lisant les œuures de Galéne, & d'autres docteurs, lesquels ont traité methodiquement la medecine. Par ainsi nous ferons fin de la premiere partie de ce present traité: priant au Seigneur, de nous donner la grace de bien paracheuer la reste.

Le

LE DEUXIEME LIVRE,

*Lequel traite de la curation des
playes faites de trait à
poudre.*



NOUS auons dict en la premiere partie de ce petit traité, qu'icelle partie q̄ nous appellons theorique en tout art, à este iuuentee pour vrayement cognoistre la verité. Mais icelle partie q̄ nous appellos pratique, estre trouuee, pour mieux exercer & mettre à fin icelles operations lesquelles sont requises estre faites, suyuant icelle verité. Nous auons pareillement dit, que la fin de toute methode, à son propre scope & regard, pour trouuer remedes propres, pour restituer le patient a guarison, & santé. Par ainsi
le chi

le chirurgien est bien vſité en ſa methode , & bien inſtruit de ſes indications , il peut facilement venir à chef de merueilleuſes & grandes operations qui ſuruiennent en la chirurgie. Il eſt à ſçauoir maintenant , que curation eſt double : c'eſt à ſçauoir generale, & particuliere. La generale eſt celle qui demaine ſeulement par vraye methode : mais la particuliere conſiſte en la deſcription & ordonnance des medicamens , & en la vraye maniere de mettre à execution les operations de l'art ; & icelle eſt deduite & diuiſee en troys parties : à ſçauoit en celle qui guarit les maladies par regime & ordonnance de viure, que les Grecz appellent *diæticen* : & en celle qui guarit les maladies par remedes & medicines, qu'on appelle en Grec *pharmaceuticen*

Curation eſt double.

tien : & en celle qui guerist seulement par operation manuele , que nous appellons chirurgie. Et de ceste derniere partie auons nous deliberé de traiter en ce deuziesme liure, parquoy tu en commenceras la curation particuliere , en telle sorte comme cy apres te sera demonstree. Si tu es appelle pour aller visiter quelque patient, tu considereras en quelle partie du corps la playe aura esté faite, & diligemment aduisesas, si la curation est possible , ou non. Et si ainsi est que la playe soit guerissable, & que le boulet soit detenu en la plaie des le commencement avec instrumens idoines, tu le viendras a oster , a fin que en apres ne se vienne à profonder , & rendre plus occulte. Toutes fois aduient bien souvent , qu'iceluy trait ne se peut des le commencement oster, a cause du

grand

grand flux de sang, ou de la profondeur du lieu: ou pour ce qu'il est paruenü aux parties nerueuses, membranes, ou osseuses: & alors l'ablation d'iceluy traitt se differe, iusques aux iours ensuiuans. Et est à sçauoir qu'il y a plusieurs & diuers instrumens, tant droictes que courbes, pour tirer hors iceluy boulet: & tous ceux desquelz on a vsé iusques à maintenant, sont au bout dentez, ou ont en la pointe vne ronde cauité, pour enclore ledict boulet, & iceux sont fort idoynes & propres, entre tous les autres. Toutesfois, celuy lequel depuis peu de tēps a esté inuenté, nous plait fort, la forme duquel ie declareray. Il y a vne buse rōde & droictē, de la longueur d'vne palme, vn peu plus grosse que n'est vne plume avec laquelle on escrit, & au milieu d'icelle y a vne

La description d'vn instrument nouuellement trouué.

terrelle bien gresle & menue, avec vne pointe fort ague, laquelle ne se boute hors, sinon quand vous tournés icelle terrelle, laquelle a, à la partie basse vn manche, en forme d'vne croix, à fin qu'on le tourne plus facilement. Car quand vous la tournez, la pointe d'icelle terrelle, laquelle est fort eguë, se vient à bouter dedans le plomb, & alors se tire facilement dehors, à cause que la pointe est tortue, & faicte en forme d'vn foret. Mais il faut sçauoir qu'iceluy instrument, ne sert tant seulement à vn boulet de plomb, lequel se peult toucher d'icelle terrelle: mais les grains d'acier, que nous appellons dragees, sont tirees avec vn instrument, que nous appellons bec de Grue, soit droit, courbe, ou denté, selon que la partie le requerra. Mais la pierre *beracius* (qu'on appel

appelle *magnes*) mise au milieu de l'emplastre, a aucunesfois tiré iceux grains dehors: & si des le premier iour iceux grains ne se peunét offer, si est ce, que le lendemain se faut du tout enforcer, pour les auoir hors, affin qu'ilz ne viennent à profond, & au surplus engendrer vn accident plus grief. Mais si tu veois que la cure soit impossible, ou que le trait soit en la poitrine, ou au ventre inferieur: lors tu ne molesteras nullement ton patient avec les dessusdicts instrumens, ne pareillement avec aucunes huiles chaudes: mais tu traiteras tant seulement la playe, le plus doucement que tu pourras: en declairant & aduertissant les amis, du peril & danger d'icelle playe. Pareillemét la poudre d'iceluy trait, laquelle est bien fort adherente aux parties contuses, combien qu'elle

La poudre

ne se puisse des le commencement
 oster : toutesfois la malignité d'icel-
 le se doit reprimer , par aydes & re-
 medes à ce propres & idoynes , &
 pour ce faire, tu y procederas en la
 maniere qui s'ensuit.

Premierement, tu feras bouillit de
 l'huile de *bipericon* (laquelle com-
 position ie diray incontinent) en vn
 petit vaisseau d'arain, ou de terre, &
 en iceluy tu tremperas tes pluma-
 ceaux : desquelz incontinent tu en
 empliras la playe : en ayant regard
 qu'icelle huile fort chaude, vienne
 bien à toucher les bortz & parois de
 la playe. Car icelle huile appliquee
 en telle sorte , vient à corriger la
 malignité de la poudre, appaise les
 douleurs , & engendre vne escarre
 point trop profonde , par laquelle le
 flux de sang est arresté : ceste huile
 se prepare ainsi.

Tu mettras en temps d'esté les fleurs de *hipericon*, & de *sambucus* au Soleil, en vne fiole de verre, par l'espace de trois ou quatre iours : au bout desquelz tu y adiousteras de l'huile d'Oliue, lauce avec de l'eau bié douce : & à chacune liure d'huile tu y mettras deux onces de *resina abientina* : en apres tu le remettras au Soleil, l'espace de vingt iours : & ces vingt iours passez, tu exprimeras bien fort icelles fleurs, & en mettras des nouvelles. Ceste huile icy est tresutile & singuliere en cest affaire, & pareillemét à toutes playes recentes, moyennât qu'elle soit mise treschaude : car elle restraint le flux de sang. Toutesfois, si par cas d'auenture le Chirurgien n'auoit aupres de soy de celle huile, en lieu d'icelle tu prendras de l'huile de *hipericon* commun, ou de *sambucus* : comme en

La composition d'huile de hipericon.

Nota.

vſant & l'applicant cōme de la deſſuſdite. En ceſt affaire, pareillement eſt fort propre l'huile de ſemēce de Lin appliquee comme dit eſt. Mais à l'enuiton de la playe, & principalemēt vers la partie ſupérieure, tu vſeras de medicamens repercuſſifz: car ilz deffendent la deſfluxion des humeurs, & confortent la partie, en reſtreinant & corrigeant l'intemperie chaude. Et ſi la playe eſt penetrante, comme en la cuiffe, bras, ou jambe, au premier appareil tu prendras vn instrument en forme d'eſguille, ſoit de fer, ou de plomb, ou d'argent, lequel tu mettras à traucers de la playe: mais en la partie poſtérieure d'iceluy instrument, doit eſtre vn trou, auquel tu mettras vn plumaceau rond, lequel ſera abbrené de l'huile bouillante, predite, en le tirant incontinent: mais tu delaiſſeras
le dit

ledit plumaceau à trauers de la playe. Et lendemain tu viēdras coudre vn autre semblable plumaceau, à cestuy premier, lequel est à trauers de la playe: en le retirant, pour y mettre vn autre, lequel sera oingt de quelque huile, ou vnguent, quite semblera estre propre: Aucuns en lieu de plumaceaux, vsent de cordelles de Lin, douces, que nous appellons *Setons*, mais nous louiōt d'auantage vne corde, laquelle est enuironnee de Lin, afin qu'elle puisse mieux toucher les parois de la playe. Et sachez qu'iceux remedes sont plus vtiles, que les cauterēs actuelz, ou potentelz: car ilz blessent moins les parties nerueuses, & ne causent point grand' douleur, & font vne escaite plus molle, que les dessusdits cauterēs. Si la playe est faicte en quelque membre exterieur, comme

bras, iambe, ou cuisse : lors tu prendras de la resine abiétine , bien cle-
 re, qu'on appelle Terebentine de Ve-
 nise , en portion egale de ton huile
 de *hipericon*, & les mesleras ensem-
 ble. Et estans bien bouillantes, tu
 tréperas vn plumaceau, lequel met-
 tras dedans la playe : car les playes
 des parties nerueuses, se delectent
 & appetent fort medicaments, qui
 soyent actuellement fort chauds. Pa-
 reillement tu dois appliquer tes me-
 dicaments repercussifz, faicts de
 grains de Mirtilles, roses, bolus ar-
 menus, & le blanc d'un œuf, & vn
 peu de vinaigre. Au premier iour
 pareillement, nous deuous faire
 phlebothomie, si quelq' autre chose
 ne nous empesche, à fin de destour-
 ber & retirer les humeurs, qui de-
 fluent en la partie lesce. Douques
 si la playe est au col, en la face, ou

phlebotomie.

en l'espaule, nous ouurirons la Cephalique de la partie mesmes : mais nous devons tant seulement tirer autant de sang, comme l'aage & force du patient le requierent : en considerant aussi la saison de l'annee. Et quand le bras, ou coste est blessé, tu ouuriras la vaine, nommee *vena poplitis*, qui est dessoubz le genou, ou de la cheuille du mesme costé, ou si la cuisse ou la jambe est nauree, tu ouuriras la Basilique du costé mesme : en appliquant beaucoup de ventouses, en l'autre cuisse. Et telles reuulsions deüement faictes, dessendent les apostumes & defluxions contre nature : appaisent les douleurs, & empeschent pareillement les Spasmes, que nous appellons conuulsions. Pareillement, le prudent Chirurgien doit tousiours solliciter d'exhiber choses pro-

pres & idoines, telles, qu'elles puissent resister & contrarier à la malignité du venin. Et pour ceste intention, tu trouueras la poudre des escreuisses des riuieres fort vtile: laquelle tu prepareras ainsi.

Poudre
d'escreuif-

Tu mettras des Escreuisses en quantité raisonnable en vn vaisseau de terre, ou d'arain; & icelles à petit feu tu seicheras, ou tu les mettras en quelque four, puis apres les estemperas bien subtilement, & avec icelle quand besoing en sera, tu adiouteras la quatriesme partie de *Cornu cerui usit*: d'icelle poudre tu en mesleras vne louchie, avec la decoction de Botoine, Pimpenelle, & *Agrimonia*: & si tu n'as les dessusdictes herbes, tu mesleras tes poudres avec du Sucre, ou du syrop de *capilli Veneris*. Aussi est bien vtile en ce cas, & pareillement en toutes playes penet

penetrantes de la poitrine nostre po- Potion
Étorale.
tion, de laquelle vsons ordinaire-
ment, & se compose ainsi.

Prends les feuilles de Hipericon,
de Beroine, de Scabieuse, Pimpe-
nelle, Eupatorij, qu'on appelle or-
dinairement Agrimonia, & de Absin-
thium Romanum, mellifolium, piloselle,
origanum, aruoglossa, Cauda equina,
du vray Camepitheos, qu'on appelle
Ysa arthetica, matricaria, de summi-
tez de feuilles de choux rouges, de
chacun vne poignée: de la racine de
Cichorce, de ungula caballina, filice,
simphiti, oxilapatbi, de chacune vne
demic poignée: tu les bouilliras en
deuë quantité d'eau, iusques à ce
que la moitié de l'eau soit consu-
mée: en la fin tu adiousteras du suc-
cre bien blanc, autant comme il te
semblera bon: & d'icelle decoction,
en dōneras à tō patient deux verrees
le iour

le iour, tiede. Et si par cas d'adventure tu ne pouuois recouurer de routes les herbes & racines dessusdites, tu en prendras le plus que tu pourras, en faisant comme dict est. Je sçay bien qu'il est assez commun aux Allemans, d'vser de ces manieres de potions, dont ils en ont grand honneur. Mais quant à ce qu'ilz viennent à mettre du lard au trauers de la playe, quant aux playes charneuses, d'autant qu'il est vnctueux, il vient à acclereler la suppuration, mais d'autant qu'il est salé, il nuit aux parties nerueuses. Mais iceluy no-
cument ne leur est fort grief, à cause qu'ilz ont corps durs & robustes. Car à semblables corps est requis d'appliquer medicaments durs & robustes. Apres auoir decemment appliqué ces dessusditz remedes, il est necessaire que l'escarre

Nota.

causée

causee de l'huile bouillante, laquelle est adherante aux parties contuses doit estre ostee avec la chair contuse par medicaments, qui engendrent pus. Et pour ce faire est fort conuenable le remede ensuiuant, lequel est compose d'huile de semence de Lin, avec graisse de porc non salé, & de moyeu d'œuf egales parties. A ceste intention est aussi fort propre & vtile d'adouster du beurre, sans sel, meslé avec le muscillage de la racine de *althea*, ou de la semence de Lin, & faut qu'iceux medicamēts de toutes parts soyent attouchans la chair contuse. Et ne sera que fort bié fait, par l'espace de quelques iours fométer la playe de lait chaud. Car la fomentation de lait, vient à appaiser la douleur, & en fōt les chairs contuses plus molles & preparees à suppuration. Pareillement est fort

vtile

utile de fomenten la playe de la decoction de Mauue, Betoine, & Scabieuse, en mettant sur la playe vn emplastro tel qu'on est accoustumé d'appliquer aux playes recentes & nouuelles. Comme celle qui est composee de refine de Sapin, de Cire, du Beurre & huile : ou d'iceluy, duquel nous traiterons en la fin de ce petit traitté, lequel auons souuent esprouué : & lors que l'escarre & la chair contuse seront ostees, par le moyen d'iceux medicaments : alors nous faut garder d'vser de medicaments suppuratifz, que les Grecz

Nota. appellent *Pyopœa*. Car si nous vfions d'auantage d'iceux, nous ferion l'vlcere sordide, plegmoneuse, putride, & puante. Parquoy sera plus conuenable alors d'vser de medicaments deterfifz. Mais si la playe n'est guere profonde, tu n'vseras de

fort.

fort grande absterſion : mais de telle
qualité comme le médicament qui
ſ'enſuit : lequel eſt fait, d'une par-
tie de Reſine abétine, cadmie clo-
te, que nous appellons *Lapis cala-
minaris*, demie partie, mirrhe la qua-
trième partie : en adiouſtant autant
de farine d'orge, comme il ſera con-
uenable pour former vn vnguent.
Et ſi tu le veux auoir plus liquide, tu
y adiouſteras vne portion d'huile de
hiperic on ſimple. Et de ceſtuy vn-
guent, tu en oindras les plumaceaux,
leſquelz tu mettras dedans la plaie.
Mais ſi la plaie eſtoit fort profonde,
ou qu'il y euſt quelque partie orga-
nique penetree, lors tu vſeras de
médicamens de plus grande abſter-
ſion, comme des remèdes qui ſen-
ſuiuent : d'ont le premier ſe fait de
reſine abétine. clere vne partie,
mirrhe quatrième partie, & de miel
crud.

crud liquide, autant qu'il te semblera bon, pour la forme de l'unguent. Et s'il t'est requis de l'auoir plus mol, avec les simples dessusditz, tu adiousteras du ius d'aloine, extrait avec du vin blanc, autant qu'il te semblera bon. L'autre dterfif duquel auons vsé souuent aux playes profondes, & sinueuses, avec grande vtilité des patiens, est fait du ius de *climenum*, duquel tu prendras demy liure, clarifié. Les François appellent icelle herbe *figea*, à cause qu'elle est fort propre aux playes du siege: & les nostres l'appellent *saponaria*. Le Ruellius, enuiuant de Vigo, le nomme aussi *climenum*. On l'appelle aussi aucunesfois *ωοταμωγύτρον*, à cause que ordinairement elle se treuve auprès des riuieres. Parquoy avec iceluy ius tu adiousteras deux onces de Resine abiëtine

abietine clere, de mirrhe demie once, de miel bien cler vne once, tu boulleras tous ces simple ensemble, puis le couleras ; & incontinent tous chaud en mettras dedans la playe. Vn autre lequel mundifie les playes sinueuses. Prends *climini betonice* ; parties equales, lesquelles tu arrouseras de vin blanc subtil ; en prenant vne demye liure de ius, auquel adiousteras vne demie once de bonne mirrhe, & vne once de bon miel, lesquels tu bouilleras vn peu sur vn petit feu, apres tu les couleras ; & d'icelle colature tu en icterras dedans la sinuosité de la playe. A icelluy mundificatif nous y auons aucunes fois adiousté de l'egiptiac, de le. de Vigo & aussi de la poudre de Mercure ; selon qu'il nous sembloit que la chose là requeroit. Apres que tu auras co-

Mundificatif.

gneu que la playe sera mūdifiée, il te faudra vser de medicamens sarcotiques : c'est a dire generatifz de chair. Car il est requis, apres que la playe est mūdifiée, de la remplir de chair. Laquelle chose tu pourras accomplir, par le remede qui sensuit.

*Vnguent
sarcotique.* Pren trois onces de gresse de porc non salée, & en eaue de plantain bié lauce : vne once de *lapis calaminaris* aussi lauce, d'*olibanum* demie once, *tuthie preparata* deux dragmes : & aussi prendras de la resine abiëtine, autant qu'il te semblera estre suffisant lauce en eaue de plantain, pour former vn vnguent mollet, & aussi tu fomenteras la partie blessée de la decoction de climenum, hipericon, agrimonia, betonica & de plantain, faite avec vin cler & eaue egale portion. Apres tu mettras sur la playe le remede qui s'ensuit, lequel

quel est fait de resine abiëtine bonne & clere, lauée en eau de plantain deux onces, de miel rosat vne once & demie: de mirrhe sarcocolle chascune demie once. *lapidis calaminaris* lauée en eau de morelle vne once & demie : d'huile rosat autant qu'il est conuenable pour la forme d'un vnguent mollet. Du dessus nommé tu abeuueras tes plumaceaux, lesquels tu mettras dedans la playe par forme de plastre. Et par ce moyen tu viendras petit a petit réplir ta playe laquelle estoit profonde, & sinueuse. Ami Lecteur considere diligemment de combien de sorte de medicamens nous auons changé, des le commencement de la *Nota.* curatiõ de ceste maladie, pour pour suyuit vne chascune intention. Et que impossible est de scauoir du tout exactement, & absolument

traicter de Pacuratiō d'vne maladie: mais qu'il est necessaire auoir vne bonne grande coniecture artificielle, & d'vng bon iugement, deuant que scauoir changer les remedes selon que les maladies le requierent. Car d'autant que la playe est plus sinueuse & profonde; d'autant requiert elle medicamens plus absterifs. Parquoy nō sans cause sont les empiriques vituperes & reprobues des doctes. Car ils veulent par vn seul remede guarir toutes playes. Et a fin que ie t'enseigne comment l'empirique ne peut rien traicter en l'art comme il appartient, ie te racompteray vn exemple digne d'estre noté. Quand i'estoy deuant

Exemple.

Terroianne, lors qu'elle estoit assigee des Bourguignons, par cas d'auenture aduint que quelque gros personnage de D'ouay fut blessé au

col.

col d'un trait a poudre : iceluy trait auoit penetré les muscles posterieurs du col, & estoit sorty par la partie inferieure de la mandibule. Icelluy personnage estoit sollicité de vn vieillard empirique, qui estoit aux gages de Monsieur le Comte de Bure. Des le commencement il vint à mettre cordeaux de lin doux, lequel estoit oint de vnguent apostolorum, & à l'entour de la playe vsoit de medicamés repercussifz. Les iours ensuyuant, lors que la playe fut nettoyée des chairs contuses & meurdries, elle rendist matiere loable, & par l'espace d'aucuns iours n'y eut apparence d'aucuns accidens. Mais apres que la playe fut mûdifiée, troys semaines apres des le premier appareil, riens ne fut changé ne permuté, disions souuēt & prions audit empirique qu'il

voulist changer ses medecamens selon que la maladie le requeroit : ce qu'il ne voulut faire , mais voulut tousiours vser de son mesme vnguent, parquoy la playe par succession de tēps se rendit sinueuse, & le patient estant retourné en sa maison, la playe se vint à maligner : & ainsi ce pouure personnage mourut : & est certain que si le viellard empirique eut voulu changer ses medecamens comme ie luy prioie de faire il eut facilement paruenü à la fin pretendü. Parquoy on deuroit considerer ce qui suruient des choses qu'iceux empiriques font. Iceluy exemple auons voulu mettre & declarer, à fin que plusieurs chirurgiēs peu exercez en l'art , se veulent appliquer a estudier, pour auoir plus grande cognoissance de la methode. Alors donc que la playe par

l'œuvre

Pœuvre de nature & ayde des medicamens sarcotiques sera remplie, il sera besoin d'vser de medicamens epulotiques, que les praticiens appellent cicatrifatifz, comme est cestuy qui s'ensuit. Prends les fueilles de *ligustrum*, *rubus*, *agrimonia*, & de plantain: & les boulz en vin rouge iusques a ce que la moytie soit contommee: & de ceste decoction, tu fomenteras la playe. Apres tu le seicheras d'vn linge, en mettant apres dessus la playe de la chaux bié lauee, & puluerisee, les os pareillement des iambes de mouton brusles & mis en poudre, & *lapis calaminaris* bien lauee, sont cicatrifatifz: & aussi est *alumen* bruslé, lequel oste aussi la chair superflue. Il reste maintenant que nous commençons a parler des affections contre nature, lesquelles auons en la premiere partie

Medicament epulotique.

*Flux de
Sang.*

appellé accidés ou accessoires. Nous
 traiterons donques premierement
 du flux de sang. Or comme ainsi
 soit q̄ du tout impossible est de cou-
 dre la playe de la veyne ou de l'ar-
 tere, il nous conuendra faire reuul-
 sion en telle sorte comme il a esté
 dit en la premiere partie de ce trai-
 té. La reuulsion faite, il faut du
 tout diligenter d'estouper l'orifice
 du vaisseau, ou par l'application
 des medicamens emplastiques, les-
 quelz de leur qualité viennent à
 ioindre les parties separees & des-
 jointes, & d'iceux medicamens le
 meilleur, & de plus grand efficace
 est de Galene au cinquiesme de la
 methode, lequel reçoit deux parties
 d'encens, & vne partie d'aloés: &
 que tous deux soyent bien pulueri-
 zés, & alors que occasion se addone
 ra d'en vser, tu adiousteras autât de
 blanc

blanc d'œuf qu'il sera besoin pour le reduire en forme ou spiffitude de miel : lequel tu appliqueras sur des poilz de lieures qui te serviront en lieu de plumaceaux , lesquels tu mettras sur toute la playe en assez bonne quantité. Et bien souuent en lieu d'encens Galene à vsé de manathuris, qui est l'escorce d'encens. Les meilleurs poilz de lieure & les plus doux sont ceux qui sont arrachez es aisnes du lieure : aucuns empiriques meslent iceux poilz menus couppéz dedans le medicament , non entendans que le poil sert seulement de plumaceaux . Et en faute du medicamét predict, nous auons souuent vsé de cestuy qui s'ensuyt : Prenez *sanguis draconis* , mirrhe en poudre , mastic ana vne partie , de farine de sebues deux parties, tout soit bien puluerizé en-

semble, & lors que vous en voudrez vser, meslez le avec le blanc d'un œuf, tant que tout soit de bonne espaisseur, & soit mys & estendu sur des poilz de lieure en lieu de plumaceaux. La laine qui tombe ius d'un peuplier, est aussi fort singuliere & de plusieurs fort esproouée en ceste affaire. Audessus de la playe tu mettras vn emplastre astringent, comme cestuy lequel est fait de farine de feues, bolus armenus & encens, en menant tout à bonne espaisseur avec le blanc d'un œuf. Iceux deuoirs deuement accomplis, tu vseras de bonne ligature, laquelle doit encommencer à la partie inferieure, & terminer vers la fontaine & source du lieu. Et quand icelle ligature ne se peut faire comme au col & aux tuniques du cerueau, alors est questiõ de le restraindre

dre d'autre moyen. Et pour l'amour des bons estudians & praticiens & des malades, ie racompteray quelque pratique digne d'estre notee, laquelle cy apres pourra proufiter à plusieurs. Lors que ie lisoye en Arras aux compaignons chirurgiés, aduint que l'hoste de saint Iulian *Nota.* sur le marché d'Arras, fut blessé au col, de telle sorte que la vaine spagitis (que autrement les praticiens appellent iugulaire dextre) fut a demy coupee, ensemble avec l'artere. Des le commencement plusieurs & diuers remedes y furent appliquez, comme la chose qui estoit fort urgente le requeroit : mais par nulz moyens & remedes que les chirurgiens y feissent, de la premiere semaine le sâgne se pouuoit nullemét restreindre, mais d'heure en heure tousiours se reprenoit à saigner :

ce voyât on appella trois medecins, & quatre chirurgiens, par le conseil desquelz il fut dit d'appliquer le medecament dessusdit ordonné par Galene, moyennant que l'un des chirurgiens fut toujours present, à fin de bien doucement tenir ledit medecament de son doit sur la partie, ce qui fut fait, & par ce moyen restraindit le flux de sang avec grande honneur des medecins & chirurgiens, en preservant aussi le patient de mort, en moins de six iours. De la mesme maniere vsons nous quand la grande veyne qui passe au milieu de la cuisse est coupee. Voila comment par ce moyen icy escrit, & aussi par deue situation de la partie, plusieurs on esté preseruez de mort, lesquelz n'eussent autrement peu échapper de mort. Quand tu vois doncques aucuns grans vaisseaux

seaux estre rompuz & blessez , tu y
dois rendre grand peine , côme cy
dessus est demonstrez , & tu en pre-
serueras plusieurs de mort. Toutes-
fois il est a noter que les dessusnô-
mez medicamens sont plus vtiles
aux playes recētés, que vieilles & pu-
trides, car quand il y à pourriture en
la playe, il vauz mieux vser de escha-
rotiques, & entre to^s, le vitriol brus-
lé est le plus singulier, & pareillemēt
la lie ou feces , qui se treuve au
fond du vaisseau , lors que lon a fait
la poudre que lon appelle *precipita-
tus*. Au surplus si l'artere est rompue,
de telle sorte, que le sang ne se puist
restraindre par nulz medicamens
locaux , alors il est du tout requis &
necessaire de trencher l'artere à tra-
uers, avec vn instrument a ce propi
ce, car incontinent apres elle se re-
tire dedans les parties charneuses, &
le flux.

*Incision de
l'artere.*

le flux se vient a arrester: d'auantage il est besoin d'ordonner vn regime de viure qui peut espessir & engrossir le sang, a fin qu'il ne soit si subtil & fluide. Parquoy le patient doit manger orge cuit avec du ris: il doit pareillement manger des potages faitz de laitues, surelles, porcelaine, & autres tēblables: doit vser aussi de la chair de veau, de pied de mouton ou de bœuf, avec du verd ius, ou de ius de surelle. En temps d'esté, il doit vser de la pulpe de pommes d'orange, avec du sucre, & de l'eau rose: entre le disner, & le soupper il boiue de l'eau avec du sirop de pōmes de coing ou violat, ou d'aigrette ou acetoux: le pauement ou le plancher de la chambre, ou le patient est, soit couuert de fueilles de vignes, ou de faux, ou arrousé d'eau froide.

Il doit

Il doit euter toutes grandes motions & perturbations d'esprit, & de mouer à repos. il y a plusieurs autres remedes mis par escrit, & ordonnez par les docteurs pour restraindre le flux de sang, mais nous auons voulu icy, tant seulement mettre iceux, de lesquels tu peux vser avec honneur & grande vtilité des patients. Or en poursuiuant nostre matiere, venons maintenant, à traiter de spasme, ou conuulsion. Quand la playe sera en partie nerueuse, incontinēt & des le premier iour tu dois regarder & obuier que la conuulsion ne suruienne. Si la playe donc est au pied, ou au genou, tu dois appliquer sur les aines ce medicament qui s'ensuit: Tu prendras de la gresse de renart, & de la moule de cerf, de chascune deux onces, de labdanum, stirax calamite, & des vers

Spasme

de terre puluerifés de chacune vne dragme: *stirax liquide, castorei*, de chacune demi dragme: avec vn petit de cire, le tout soit reduit, à l'espeſſeur de miel, dequoy les aisnes & les parties a l'enuiron de los *sacrum* ſoyent bié ointes, en appliquât audeſſus de la laine chaude. Cest vnguétici neſt point ſeulement bon aux conuulſions & ſpaſmes, mais auſſi lors que les parties commencent à ſe retraire & entrer en ſpaſme. Le remede qui ſ'enſuyt a pareillement ſemblable vertu. Prens huile vulpin, danet, & de lombric, de chaſcune vne once, *macks benzoy, ſtiracy calamite*, de chaſcun vne dragme, *croci* la troiſieme partie d'vne dragme, cere aũtant qu'il en faut pour la forme d'vn liniment. Mais lors que la playe ſera au bras, ou en la main, tu appliqueras les deſſusdits medicamens aux

aſſe.

aisselles en oindant pareillement les spondilles du col, & du doz. Et si tu n'as pas auprès de toy iceux médicaments, tu oindras la Nuque & les autres parties, comme dit est, avec huile de vers de terre, en laquelle tu auras adiousté vn petit de Safran, ou de *stirax calamite*, ou avec nostre huile de Hipericon, faiçte avec Resine abiétine. Si le patient estoit riche, lors que la conuulsion commence, il seroit fort vtile de faire vn bain d'huile d'oliue, ou de huile de nauette, ou de semence de Lin. Le bain doit estre moyennemēt chaud, mais la playe ne doit estre nullement touchée de l'huile, si possible est, & y soit enuirō demie heure, s'il semble au Chirurgien estre cōuenable. Et ce suffira pour la deffence & precaution de la conuulsion, & aussi de la curation, lors qu'elle

commencera.

*Sedatio des
douleurs.*

Maintenant venons à la sedation des douleurs. S'il y a donques grande douleur cōpliquee avec la playe, laquelle si elle prouient de quelque intemperature chaude, tu fomenteras la partie affligee de ius de *Violaria*, de Morelle ou de Plantain : & si la playe est orde & chaude, & qu'il y ait encore de la chair contuse, la fomentation d'eau chaude est fort conuenable. Mais si la douleur procede de quelque humeur acre, lors sera meilleur basser la partie de lait chaud, & mettre l'vnguent, qui s'ensuit dedans la playe, lequel est sedatif de douleur. Prends farine de froment bien blanche, vne once; farine de feues, demie once, encens puluerisé, pierre calaminaris lauee d'eau de Plâtain, de chacune vne dragme: le ianne d'vn œuf, de Saffran la tier-

ce pattie d'vne dragme : d'huile ro-
 sat, autant qu'il sera requis pour fai-
 re vn vnguent mollet : d'iceluy vn-
 guent, ru vseras sur les plumaceaux,
 & en feras ton emplastre. Pareille-
 ment la decoction de Betonia, faite
 en eau & vin, egale portion, appaise
 fort les douleurs. Mais si l'attrition
 ou ruption des nerfz estoit cause de
 la grande douleur, il sera tres bon
 de le couper, car ce faisant tu ap-
 paiseras la douleur, en ostant pa-
 reillement le peril & danger de spas-
 me, qui pourroit suruenir. Defail-
 lement de cœur, aduient bien sou-
 uent en ceste maladie, à cause des
 vapeurs mauuaises, esleuees de la
 playe, qui paruiennent iusques au
 cœur. A ceste affection sont fort
 propres & conuenables tous reme-
 des, lesquels peuvent restaurer &
 conforter le cœur, comme les fleurs

*Defaille-
 ment de
 cœur.*

de Buglosse, accoustrees & preparees avec du Succre, ou la semence de Citron preparee avec du Succre: la poudre pareillement des Escruilles de riuere bruslees, est singulierement bonne. Et aussi *cornu ceruinum* bruslé, & aussi du bon vin, prins la quantité d'vne cuillerée, la pulpe de la pomme d'Orange, accoustree avec du Succre, eue *rosarium*, & ius de Surelle. Pareillement pommes de grenades acceuses, sont conuenables. Mais si par trop grande douleur le defaillement de cœur aduenoit, tu enquesteras & chercheras la cause. Si elle prouient d'interemperature chaude, tu aduiferas de l'oster par le moyen dessusdit. Nous auons aussi dict comment on peut oster & mitiguer l'Acrimonic, des humeurs: & comme il faut aucunes fois couper le nerf à trauers: car il

vaut

vaut mieux laisser la partie debile & affoilee, que de laisser mourir le patient sans ayde. S'il aduenoit aussi que le defailement de cœur vint par le flux de sang, il faudra restraindre ledit flux, comme dit est, & puis bailler chose pour cōforter le cœur, en epithimant autour du cœur de choses refrigerantes & conseruantes les vertuz & forces du cœur, comme avec cestuy qui s'ensuit: c'est assauior, avec eue rose, & de Surcele, & vn peu de vinaigre, en adioustant de la poudre de *grana tinctorum*, & *santali citrini*, & aucūs grains de Camfre: & cecy est fort singulier en esté, & se doit appliquer autour de la region du cœur, tiede, avec vn drap d'escarlate. Si d'auençure il faisoit froid, il faudroit adiouster vne portion de Maluoisie, en ostant le Camfre, s'il te sembloit cō-

uenable. Si d'auenture il suruenoit
 fièvre agüe & forte, elle se doit oster
 par bon regime & maniere de vi-
 ure, & aussi remedes à ce propres:
 & doit en cest affaire le Chirurgien
 appeller avec foy vn Medecin, &
 vser du conseil d'iceluy. Et si aucu-
 nes tumeurs y suruenoyent, tu les
 gueriras, comme te demonstre Ga-
 lien, au second liure *ad Glauco.* & es
 deux derniers liures de sa Methode.
 Nous voyons bien souuent aduenir
 en icelle affection de phlegmons, &
 alors au commencement sont fort
 vtils fomentatiõs resolutiues: com-
 me la decoction faite de *Betonica,*
agrimonia, *climenum,* *millefolium,* *sum-*
mitates brassicæ, *pimpinelle,* & *figi-*
lum Salomonis, laquelle appaise fort
 les douleurs, resoult les Tumeurs,
 & mondifie les playes: & certes
 nous auons tousiours trouué en *fi-*
gillum

gillum Salomonis, vne grande vertu, pour resouldre les Tumeurs : & pareillement, si tu l'appliquees chaude en vne squinantie, elle resoult, & aussi elle est fort propre pour guerir les sciaticques. Mais si la tumeur est avec intemperature chaude, tu adiousteras à la decoction precedente des feuilles de Plantain; autant qu'il te semblera estre suffisant pour oster ceste chaleur. Et ne faut qu'aucuns Practiciens s'esmerueillent si aux phlegmons nous vsions d'herbes chaudes : car bien souuent la fomentation de choses chaudes dissipe, & guerist l'intemperature chaude. Aussi le Cataplasme fait d'herbes predictes, en adioustant de la farine de froment, ou d'orge, resoult & digere les phlegmons : & par accidents oste l'intemperature chaude. Toutesfois, il est bien requis en

fomentant : d'auoir bon iugement, c'est assauoir de fomentier iusques à ce, que ce qui est attiré par la chaleur de la fomentation, se puisse euacuer au dehors. Les tumeurs molles, & œdematodeuses, & flegmatiques se pourront espartre & resoudre par le remede qui s'ensuit.

Tumeur piteuse.

Tu prendras les racines de *brionia* : & de *sigillum Salomonis* : & les bouilliras en lessiue, ou avec du petit vin : & toutes chaudes les enuopperas en vn linge, & les mettras sur la partie malade, & des dessusdictes racines, en adioustant de la farine d'orge, & de fenugrec, tu feras vn Cataplasme. Les *Erisipelas*, tu les gueriras avec refrigeratifz, comme Morelle, plantain, *poligonum*, *intibum*, & *folia mori*, bouillies en eue, ou d'eue distillee d'elles: en regardant diligemment, quand

Erisipelas.

il faudra cesser de ceste application.

La tumeur scirrheuse, pour ce que *Scirrus*
bien peu souuent elle survient en
ceste maladie, nous n'en traiterons
point, il nous suffira pour l'vtilité
des Chirurgiens & malades, auoir
seulement traité de ce qu'il m'a
semblé estre expedient à nostre ma-
tiere. Et ainsi ferons fin, en remer-
ciant & rendant graces au Crea-
teur, auquel soit honneur,
& gloire perpetuel-
le. Amen.

G f

LA SECONDE

PARTIE DE CE PRE-

sent traité, contenant la pres-
 seruation & curation de
 la peste & dysente-
 rie, avec methode
 & raison.

Definition
 de la peste.



PESTE est vn Phlegmō
 venimeux & cōtagieux,
 duquel si le sãg est adust
 ou incineré, est faict an-
 thrax, ou carbo, en vulgaire, char-
 bon. Et à la peste, ou le charbon,
 le plus souuent avec soy adiointe la
 fieure continue, laquelle aucunesfois
 precede la Peste, & le plus souuent
 vient apres icelle. Les accidents cō-
 muns, qui aduiennent en ceste dan-
 gereuse maladie, sont vomissemens,
 causez par la matiere venimeuse, qui
 paruiet à l'estomach, pesanteur de
 teste

teste, somne pesant & turbulent,
 par vapeur mauvais & venimeux,
 qui montent au cerueau. Aussi ad-
 uient Palpitation, ou tremblement
 de cœur, par iceux vapeurs cor-
 rompuz, qui paruiennent au cœur,
 & est ce batement, ou palpitation
 vn mouuement insigné de la vertu
 expulsive, qui s'efforce d'expellir ce
 q luy est contraire. Et differe la peste
 à vn autre phlegmon, en ce q le sang
 qui est defeté hors des vaisseaux, tiét
 la nature du venin. Nous appellons
 en ce lieu venin ce qui de sa propre
 substance est corruptif du corps hu-
 main, ou par sa qualité intense, cômme
 est le sublimé & l'opium, ou par sa na-
 ture, contraire à celle du corps hu-
 main, comme est la salive d'vn chien
 enragé & des serpens, & le jus de na-
 pellis, cicuta, & autres: combié que les
 choses qui sont venin de toute leur

*La cause
de la peste.*

Qu'est venin.

sub

substance, ne corrompent point le corps, sinon qu'en alterant les esprits, humeurs, & parties solides: & est nommé venin à uena, quòd per uenas facile sese insinuet. Et aussi dist-
 fere la fièvre pestilentielle, des autres fièvres putrides, que la cause interne, soit sang ou autre humeur, à déslors prins la nature de venin, par laquelle est alteré & mué le corps fort subitement. Et est ceste maladie contagieuse, à raison que l'humeur putride estant au corps, gette ses vapeurs infects en l'air cir-
 uoisin, & le gaste & infecte: & lors que l'air infecté est attiré par quel-
 qu'un, il corrompt & infecte les esprits, & les humeurs, lesquelz il trou-
 ue plus prompts à receuoir putrefa-
 ction. Et ne se faut donner merueil-
 le, si l'air, qui est subtil, ayant natu-
 re venimeuse, corrompt subit le
 esprit

Commēt la
 fièvre pesti-
 lentielle dif-
 fere des au-
 tres.

esprits & humeurs du corps passible, tout ainsi qu'une petite scintille de feu allume subit la paille & le bois sec : & en tel cas on doit admirer la sagacité de nature, laquelle de toute sa puissance, lors qu'elle sent les esprits & humeurs corrompuz, fait son deuoit d'expeller iceux, le plus loing qu'elle peut des parties principales : dont diceux sont engédtez le phlegmon & les anthrax ou charbons, lesquels ont pour leurs accidens propres, tumeurs, rougeur, douleur, avec renitence au tact : & a le phlegmon venimeux ses differences, comme les autres apostemes : de l'humeur predominant, & compliqué avec le sang. Et la curation du phlegmon contagieux, a vne commune indication, comme ont les autres, c'est assaouir, euacuation de la matiere cõtenuë en la partie affligée, que

*Curation
methodi-
que.*

gee,

& la diuersité d'icelle euacuatiō doit
 estre chāgée, selō la diuersité des par
 ticules patientes. Et la dite euacuatiō,
 quād est en soy, peut aussi bien estre
 cause de grād mal cōme de grād biē
 car il est certain q̄ cest vne cōmune
 indication que d'euacuer en tel cas:
 mais par quelle partie & cōment la
 partie affligee l'enseigne, & sur ceste
 indication errent grandement ceux
 qui sont peu exerceitez en l'art de
 Medecine, ou de Chirurgie, à cause
 qu'ilz pensent q̄ telle reuulsion doit
 estre faicte au phlegmon venimeux,
 comme à celuy qui n'est point veni
 meux : & ordinairement aduient que
 celuy qui est touché de la peste, en
 uoye querir le Chirurgien pour estre
 saigné, ayant grand espoir q̄ la phle
 botomie luy est vtile: mais le patient
 & le Chirurgien indocte ignotent,
 que la phlebotomie mal faicte, &

*Indication
 prinse de la
 partie lesee.*

sans

sans iugement, est cause de la mort du patient: & que si ladite phlebotomie est bien faicte & cōme il appartient, elle est cause de la santé diceluy.

Exemple. Si vn phlegmon nō venimeux a occupé les parties des aisnes ou des hanches, c'est bōne & louable reuulsiō, d'ouuir la Basilique du bras du costé affligé: mais en pestilente cōdition, telle reuulsiō est fort nuisible: mais en ce cas faut ouuir la Saphene vers le genou, ou vers le pied de la partie lēsee, laquelle correspond directement à la partie affligée, & tire le sang & autres humeurs venimeux arriere des parties nobles: & ceste indication est prise de la nature & condition de la maladie. Et de ceste phlebotomie, nous en parlerons plus emplement, en la partie suyuant, qui traite de la pratique ou partie operative.

Exemple

*Indicatio
à nature
morbi.*

DES PRONOSTI- ques de ceste maladie.



VAND anciennement ceste maladie cõtagueuse regnoit, le cõmun peuple pensoit qu'elle auoit esté enuoyee diuinemēt, pour punir les pechez des hõmes vicieux, comme appert par ce qu'escriit Homere, en son premier liure des Iliades, qui refere comment la Peste, qui aduint au camp des Grecs, prouenoit à cause que Appollo estoit courroucé de l'offence qu'auoit fait Agamemnon, en rauissant & tenāt par force le belle Chriseis, fille du grand prestre d'iceluy, nommé Chrises. Et de tel cas pouõs prédre exēple en l'anciē testamēt, de l'offēce du roy David, par laquelle fut immise la peste en Iudee, sur les subiects d'iceluy: & de ce n'ē faut faire doute: car ce mōde inferieur est

Homere.

perpetuellement dirigé par la puissance diuine, laquelle conduit toute chose & punit diuerſement ceux qui ne veulent delaiſſer leur vie peruerſe & inique. Mais Hypocrates noſtre bon pere, lequel à ſemé la bonne ſemence de vraye doctrine, à mis les premiers fondemens de la medicine, laquelle ſemence à eſté cultiuée diligemment par grand iugement & labeur continuel, par Galéne homme abſoluit en toute bonne doctrine, lequel à illuſtré & mis en grand hōneur les eſcritz d'iceluy, & dauantage a poſé & mis avec vraye raiſon, la vraye conſtitution de l'art de medicine, & apres a pourſuiui avec grand zele du prouffit public la medicine, pour la cōduire a perfection, non ſeulement par la partie theorique, mais auſſi par la partie operatiue. Hippocrates

*Diuine
prouidēce.*

*Conſtitu-
tion de l'art
de medeci-
ne.*

& Galene ont escrit & parlé de la cause des maladies; non secōd quelles sont enuoyees de Dieu, ains secōd qu'elles procedent naturellement par causes naturelles, &c. Ilz cognoissoyent le corps humain estre subiet a diuerses alterations, & que necessairement nous faut attirer l'air tel qu'il est, & quand il est corrompu, il corrompt les esprits: puy le sang, & consequemment les autres humeurs, dont s'ensuit la fiere continue, les phlegmōs & anthracs, ou charbons, & en ceste dangereuse maladie, il en meurent plus, qu'il n'eschappe. Et de ceste chose rend bonne raison Hippocrates en son premier liure des Epidemies disant. *Cruda uero & incōsta atque in malos accessus conuersa, aut acrisis, aut labores aut diurnitatē indicāt.* Et Galene exposant ce passage dit q̄ tout ainsi que

*Nocumens
de l'air cor
rompu.*

*Causa mor
ris.*

que

q̄les bōnes cōcoctions se font quād
 nature surmonte les causes des ma-
 ladies: aussi quand icelle ne les peut
 surmonter aduient le contraire : car
 la concoction, nous monstre tou-
 iours bonne termination des mala-
 dies par bonne crise, & bonne se-
 questration des humeurs pechans.
 Mais en ce cas, bien peu souuent ap-
 paroissent les signes de cōcoction,
 ou de vraye crise: car combien qu'il
 suruienne vomissement de ma-
 tiere corrompue, principalement de
 cholere, flux de sang par les nari-
 nes, sueurs & egestiōs fetides, iceux
 accidens ne sont point critiques :
 mais symptomatiques, ou acciden-
 taires, nature non ayant la puissan-
 ce de faire sa concoction, cōme el-
 le voudroit bien, à cause de la ma-
 lignité des humeurs corrompus. Et
 quand le *bubo* pestilent, ou *anthrax*

*Accidens
divers.*

Nota.

apparoit au corps humain deuant que la fiere , est meilleur signe , que quand la fiere apparoit premier : car la vertu expulsive s'efforce de getter arriere des parties nobles les humeurs corrompus, en les expulsant du centre du corps , aux parties superficielles d'iceluy. Et en ce cas, les passions de l'ame aux timides & craintifz, rendent la maladie plus pernicieuse , & en iceux les esprits vitaux sont en brief tēps suffoque : mais ceux qui prennent bon courage mettent ordre en leur maniere de viure, & ont fiance aux bōs remedes & recouirēt à iceux cōme dit l'adage Grec, *πρὸς τὴν ἱερὰν ἀντρον* à l'ācre sacree , & bien souuent sont gardés & conduits à bonne santé. En ceste maladie qui est fort aguē & dangereuse, ceux qui doiuent mourir viennent à terminer le plus souuent

*Accel-
eration de
mort.*

nés deuant le septiesme iour, & plus
 tost deuant le quatriesme : ceux qui
 paruiennent iusques au quatorsi-
 me iour , la plus part eschappent le
 danger de la mort:ceux auxquels sur-
 uiennent plusieurs taches rouges ou
 de couleur de pourpre , quasi tous
 meurent en brief temps, apres l'appa-
 rence d'icelles:& en region chaude
 en tēps d'esté en corps cholérique,
 ceste maladie est plus tost terminee,
 que es dispositions contraires, & ve-
 ritablement tous ceux qui sont tou-
 chés de ceste maladie, doiuent prin-
 cipalement auoir leur espoir a l'au-
 teur de vie, par la mort duquel som-
 mes tous viuifiés, & conduits au lieu
 de vie perpetuelle, qui remet en san- *Retours à*
 té les poures patients qui ont ferme *Dieu.*
 foy & bon espoir en luy. Auquel
 soit honneur & gloire a iamais. A-
 men.

LA PROPHILAC- TIQUE ON PARTIE *preservatiue.*

*Prouerbe
commun.*

IL y a vn prouerbe commun que l'on allegue souuent en condition pestilente, lequel dit: *Cito, longè, tardé.* Et combien qu'il soit veritable, il contient en soy plus de terreur que de conseil, & sert plus à ceux qui sont en leur liberté & timides, que à ceux qui sont subietz: car le gendarme ne peut abandonner son camp, & le marchand ne veut delaisser sa marchandise & son bien: ausquelz sera tresvtile ceste partie preservatiue, laquelle fist eriger vne image d'arain en l'honneur d'Hippocrates, par ceux de Coe, à cause qu'il les auoit deliuré du danger de la peste. Doncques à l'ayde du Createur, pour cōmencer

*L'honneur
de Hippo-
crates.*

ceste

ceste partie, incontinent qu'on voit
 que ceste maladie commence a pul-
 luler en quelque lieu, la premiere
 chose qu'on doit faire, est qu'on doit
 considerer si on a le corps pletoric
 ou cacochime, ayant habondan-
 ce d'humours, soit qu'ilz soyent
 bons ou mauvais, a fin qu'on puist
 euacuer les humours pechans en
 quantite ou en qualite: & en ce cas
 on doit tousiours auoir recours aux
 medecins doctes & bien exerci-
 tez, a fin d'auoir bon conseil tou-
 chant l'euacuation d'iceux: car la me-
 dicine donnee imprudemment, se-
 roit beaucoup plus nuisible que v-
 tile: & pour ceste cause, les bateleurs
 triacleurs, & vedeurs d'eau de vie,
 qui au grand detrimet de la Repu-
 blique abusent iournallemet le peu-
 ple, doyuent estre bannis & expul-
 ses des bonnes villes, a cause des

*Plethora
 cacochi-
 mia.*

*L'expulsiō
 des abu-
 seurs.*

abus cōmis par eux: car ils sont cause de la mort des pouures patiēns, en leur baillant choses venimeuses, pour choses vtilēs & cordiales: & en ce cas les gouverneurs lieutenans & escheuins des villes y doiuent donner ordre, autremēt en rēdront cōpte deuant Dieu: & suis certain que l'vsance d'eau de vie en estē, est fort suspecte, & qu'elle bruslé le sang d'vne chaleur estrange au foye: la q̄lle peut tellement corrompre les humeurs, qu'elle sera cause de la generatiō de la peste, de disenterie, de lepres, & plusieurs autres especes de maladies: parquoy telles pestes doiuent estre extirpees arriere du peuple. Quand a la raison du viure, elle doit estre instituee au contraire de la corruption de l'air: & doit estre de viandes de bon nōurrissement, & facile concoctiō & conuer-

uersion,

Nota.
L'vsance,
d'eau de
vie.

Raison de
viure.

uersion, comme sont, chappons, *La chair*
 poules, perdrix, leuraux, lappins, *utile.*
 tourtouvelles, faisans, poules d'In-
 de, mouton, veau, cheureaux rotis
 mangez avec les orenge, verduis,
 vinaigre avec vn petit de cannelle,
 ius de surelle: & en yuer avec vn pe-
 tit de vin, avec lequel on aura mis
 vn petit de poudre de macis: &
 vn petit de sucre. Les poissons les *Poissons*
 plus utiles sont brochetz, per- *utile.*
 ches, rochettes, gouuions, vendoi-
 ses, truittes, solles, rougets merlés, &
 limandes, & sont tous plus utiles ro-
 tis que boullis, & mangés en esté a-
 uec le ius d'orange, ou d'ozeille ou
 surelle: & en yuer avec muscade, can-
 nelle, macis & gingembre. On doit
 euitter tous poissons linionneux:
 & de facile corruption, comme an-
 guilles, plaies, loches, harens, saul-
 mons frais, & aussi tous poissons,

*Herbes &
les selon
temps.*

salez, on doit vser en potages sou-
uent de cerfueil, persin, surelle, bo-
rage, buglosse, & mettre avec le vin
trempet de la pimpenelle. En temps
d'yuert est bon de mettre cuire avec
la chair origan, sauge, Ysope, ser-
pillum que on nomme poulieul des
champs, mariolaine, feuilles de l'au-
rier: en esté on mettra des laitues, de
la chicoree domestique nommee
scariole, de la patience, & de la por-
celaine. Le pain soit moyen entre
le bis & le blanc, bien acoustré léger
& fermenté moyennement, cuit du
soit & magé l'endemain, apres qu'il
sera paré, en ostant la partie aduste
de la premiere crouste. Quant au
boire faut considerer la coustume,
ceux qui ont accoustumé de boyre
vin, en iuert ils doiuent boire du bõ vin
modestement: en esté doiuent boire du
petit vin q soit vn petit stiptic ou ver

Le pain.

delet, avec de leaue, selõ ce qu'õ a a- *Fruist*
 coustume, & lors soiët delaißés tous *sans.*
 vins doux & vins puillãs. Quãt aux
 fruits il faut euitter to^s fruits humi-
 des & putrefactibles, cõe sont cõcõ-
 bres, põpõs, melõs, prunes, & ceri-
 ses douces, pesches, & meures: & est
 bon d'vser de ceux qui sont acides,
 ou vn petit aigre ou surs, cõme sont
 les cerises rouges & frãces, les petits
 damas, les pommes de malignes, les
 grenades nõ douces, cõme sont me-
 sa, & acida: les orẽges, & citrõs en sa *Fruist y*
 lade, avec eaue rose, & sacres sõt v- *les.*
 tiles. A la fin du repas sont vtils les
 poires cuites, vn petit sacrees: & en
 tẽps de peste n'est besoin de grande
 diuersitẽ de viãdes: à cause q̃ la mul-
 titude produit cruditẽ & abondãce
 d'humeurs. Touchant de l'air ou
 on demeure, doyt estre sec, ou
 par soy ou par artifice. Parquoy *Cordis*
 est *de l'air*

est vtile d'auoir feu de bois sec & odoriferant , en esté au matin & au soir : en temps froid , toute la iournee . É est tresbon de mettre en la chambre sus vn rechauffoir du feu, sus lequel on doit mettre quelque

Choses de
odeur.

perfum de bon odeur comme storax calamite, benzoin, cloux de girofles, & ce du matin & du soir en yuer: & en esté faut espartre roses, feuilles de vignes, de iôcs, de vlmaria, brâches de chesnes & de saux.

Quand aux remedes preseruatifz, cette ordonnance sequéte en forme de lozégnes ou tablettes, est fort vtile pour le tēps d'esté en vsant a' icelles vne du matin deuant manger deux ou troys heures.
Accipias teste cancrorum fluuialium uste, cornu cerui usti, margaritarum coralli rubei, seminis citri, rasuræ eboris, seminis acetosæ, santali citrini ana partes equales.

les : radice angelicæ , octauam partem unius prædictorum. sacchari in aqua rosarum dissoluti quantum satis est : formentur tabulæ ponderis unius drachmæ , quibus utendum ut diximus. Et en téps troid , l'vſance de l'electuaire ſequent eſt tresbon. Capres ſeminis ocimi, corticis Citri, radice zedoariæ, enulæ campanæ, cornu ceruini uſti, radice tormentillæ, cinnamomi electi, maceris partes æquales, radice angelicæ tertiam partē unius prædictorū: ſacchari in aqua meliſſæ diſſoluti quantum ſatis eſt: forme tur electuariū in tabulis ponderis drachmæ unius : de ces tablettes il ſuffit d'ẽ prendre vne du matin , comme eſt dit des autres. Ces deux ayde ſont tresvtils & bien approuuees , parquoy n'eſt beſoin de multiplier pluſieurs ordõnãces. Et quãd on paſſe, ou que lon demeure en quelque lieu ſuſpect , eſt bon de tenir en la

bouc

Electua
vtilis te
pore fr
do.

bouche, du macis, ou de la racine dá gelica, ou de zedoaria. Et ne faut oublier q̄ les pillules de ruff^s s̄nt tresbōnes pour p̄seruer de la peste: & est la vraye description des pillules cōmunes vsuales p̄ tout, moyēnant q̄ à la description d'icelles on adiousté du gomme hāmoniac, a la quātité de la moitié de l'vn des simples: autrement s̄nt point la vraye cōposition de Ruffus. Parquoy l'ordonnance soit en telle forme: *Capies croci, mirrhæ, aloes, partes æquales: gūmi hāmoniaci partēs unius prædictorū dimidiāam: syropi acetositatē citri quātū satis est ad ea cōprehendenda: fingantur catapotia, quibus utendū manē uno uel tribus, longē à pastu.* Ces pillules s̄nt louees, quasi de to^s les anciēs docteurs: parquoy on les doit auoir en grāde estime, comme vn remede bien approuué: mais certēs elles sont plus vtiles en temps
 froid

ul. R.

froid ou moderé, qu'en tēps chaud. *Nota de*
 En esté est tresbō vser du matin des *ropis aci-*
 noix verdes cōfites en sucre des mi- *du.*
 rabolans, des fleurs d'orēges, & en
 yuer des racines de enula cápana. &
 noix muscades confites. Et est cho-
 se forte vtile en temps chaud, d'vser
 souuent des syrops, qui sont acetoux
 comme est *syrops de limonibus. de suc-*
co acetosa, de acetositate citri, de grana-
te acidis, & acetosi simplicis: & l'vsan
 ce d'iceux syrops doit estre vne cu-
 liere ou deux, loing du manger: &
 quād il fait fort chaud, est bō dē met-
 tre vne culieres en vn voire d'eaue,
 venāt du puis, ou de la fōtaine, & la
 boire ainſi froide. Outre les aydes
 dessusdits, en la grace des pouures
 gés, q̄ desirēt auoit secours presēt, &
 de petit pris, suis d'aduis que en tēps
 chaud ils vsent de bolus armenia- *Pro pau-*
 ca, l'auee en eaue rose, ou en ius d'o- *peribus.*
 rēge,

renges, & sechee au soleil: & en tēps
 froid, prendront pour preseruatif
 theriaque *διὰ τὸ σάρον*, à laquelle a-
 uons adiousté la quarte partie d'un
 des simples d'icelle, de racine d'an-
 geliqua, & sera la composition fort
 bonne en ceste forme: *Capiēs mirrhe
 gentiane, beccarum l'auri, aristolochie
 rotundæ partes æquales, radicis angeli-
 cæ partem quartam unius prædictorum:
 mellis bulliti ex decoctione betonicæ: &
 bene despumati. quantum satis est: fiat in
 forma opiate.* Ceste confectiō est
 aussi fort vtile contre tout venin de
 bestes: & herbes venimeuses, &
 ne doyuent iamais les gens des vil-
 lages estre sans icelle, car souuent
 les cheuaux, les bœufz & vache,
 mangent choses venimeuses, dont
 viennent a mourir: auquelz on doit
 donner d'icelle confectiō avec du
 vin chaud, laquelle gardera les be-
 stes de

*Diatessa-
ron.*

*Notandū
pro rusti-
cis.*

des de mourir à l'aide du Createur,
auquel soit honneur & gloire eter-
nellement.

LA CURATIO N. DE la Peste, ou Charbon.

Incontinét que quelqu'un se sent
touché de la Peste, premier se doit
humilier enuers l'auteur de vie Je-
sus Christ, en luy demandant par-
don de ses offenses, & requerant
humblement sa grace: puis doit re-
courir aux aydes vtilles, & auons
trouué vtile d'vser au commence-
ment de la decoction de cardo be-
nedict, de racine de larus, ou de sa
semence, & racine d'aristolochia ro-
tunda, bouillis en eau, avec vn petit
de vin blanc, & en faut prendre vn
voirre tiede, puis se faire courir &
suer: & si le patient le vomist, on doit

*Decoction
vtille au cõ-
mencemēt.*

reiterer la dite potion, & de rechef se faire fuer: apres qu'il aura sué, se doit faire essuer, puis prendre vne culieree de syrop de *acetositate citri*, ou de *limonibus*, ou *lacetosi simplicit*. Et si le patient est riche & qu'il puisse recouurer de la bõne licorne, il en fera limer & prendra de la pouldre, la quantité de dix ou douze grains pesant, avec vne culieree de syrop de roses de Prouins, & apres se doit garder de dormir: lors peu de temps apres doit le patient prendre vn cli-
Clistere. stere laxatif, pour attirer les excremens arriere des parties nobles, & s'il ne luy est possible d'auoir le cli-
 stere, & qu'il soit dur de ventre, il prendra dragme & demie de bonne Reubarba, avec deux onces de syrop d'infusion de roses de Prouins, & apres que la medecine aura fait son operation, faudra faire phlebotomie.

tomie en la forme qui s'ensuit : C'est
 assavoir, si le phlegmon, ou l'anthrax
 est aux emôctoires du cœur dessous
 les aisselles, faudra ouvrir la Basili-
 que du bras mesme où est la peste
 ou anthrax. Et si la peste est aux
 emonctoires du foye, qui sont les
 aignes, faut ouvrir la Saphene, ou
 vena poplitica, du costé mesme, ou re-
 side la peste. Et si la peste ou anthrax
 est es emôctions du cerueau, au lieu
 de phlebotomie, faudra appliquer
 plusieurs ventouses sus le col, & sus
 les espauls : faisant scarification
 profonde, & attirer bonne quanti-
 té de sang, puis sera besoin, que le
 patient se garde de dormir, le plus
 qu'il l'oy sera possible, au moins trois
 ou quatre heures, affin q' l'esprit vi-
 tal ne soit suffoqué au cœur par va-
 peurs venimeux. Et si l'anthrax est à
 la face, seras pareillement, & si l'an-

*Nota de
 phleboto-
 mie.*

thrax occupe quelque partie de la poitrine, faut entamer la veine au bras, la plus correspondante à la partie affligée : s'il se montre au ventre inférieur, ou aux costes, ou aux fesses, on doit ouvrir la veine nommée *vena poplitea*, qui se montre au dessous du genou, ou la Saphene, & toujours du costé de la partie, où est assise la Peste, ou l'Anthrax : & faut toujours tirer du sang moyennement, selon l'age & la vertu du patient. Et si le patient ne pouvoit recouurer de Chirurgien pour estre seigné, lors doit prendre des Cantharides, mises en poudre, & les mettre sus emplastre, fait de leuain, & l'appliquer trois ou quatre doigts plus bas que n'est le Phlegmon pestiferé, ou l'Anthrax, & toujours en tirant arriere de parties nobles : doncques s'ilz sont liuez aux aisselles, faut appliq

Nota sur applicati^on des anthra-

appliquer ledit emplastre sus la partie domestique du bras mesme, comme est dict : & s'ils sont situez aux aisnes, tu dois appliquer ledict emplastre sus la cuisse, à la partie domestique, comme est dit : & s'ils sont assis dessoubz les aureilles, est bon de l'appliquer sus les muscles, tirant vers la Nuque. Et quand ledict emplastre aura fait sa vesication, comme cinq ou six heures apres l'application, faudra percer les vessies, & les laisser couler, & tenir le lieu ouvert, en mettant sus des feuilles de choux. Et si le patient est en lieu où il ne peut recouurer des Cantharides, au lieu d'icelles, il prendra des feuilles d'*elleborus niger*, ou de *batrachion*, laquelle porte des racines jaunes par les jardins, & par les prés (de laquelle les gros coquins & marauds se font des playes aux bras

*Nota sur
les remede
viceratifz*

& aux jambes) de l'une d'icelles herbes estampee fera emplastre, & la mettra ainsi qu'il est dict des Cantharides : & la laissera sus vne nuit ou vn iour, & lors y aura playe, laquelle iettera de la matiere virulente en abondance, en attirant icelle partie des parties nobles. Et ces remedes, tant de cantharides que desdites herbes, sont aussi vtiles à ceux qui auront esté phlebotomez pour la cause dicte : & à cause que lesdites herbes font vlcere douloureux, faudra appliquer dessus vnguent doux, pour seder la douleur, comme celui qui est fait d'une partie de *Gratia Dei*, & de *album rassis camphoratum*. Et dessus le bubo pestilent ou anthrax, on ne doit iamais appliquer

Nota bene choses repercussives, mais choses qui doucement conduisent iceux à maturation, ayant proprieté d'attirer

tirer la matiere venimeuse, comme est emplastre fait de Scabiense, de Surelle, racine de Lis, cuits soubz la braise, avec lesquels on adioustera le iaune d'un œuf, & vn petit de safran. De mesme effect est emplastre fait de Sençon, Mauues, racines de *sigillum beatæ Marie*, cuites comme dessus, & meslees avec le iaune d'un œuf, & beurre sans sel, ou craisme doux. Aussi est bon de faire fomentation avec lesdites herbes & racines: & apres qu'on aura fomenté, appliquer emplastre de *Diachilon magnum*, remolly avec mucilage de semence de Fenugrec, & principalement appliqué sus les anthrax. On a trouué souuent grande vtilité de prendre vn coq, ou vne poule, ou canart, ou vn coulon, auquelz on ostoit les plumes d'environ le cul, puis on mettoit le cul d'i-

Diachilon

ceux sur la Peste : par ce moyen, on attiroit la matiere venimeuse au dehors : iceux animaux doyuent estre enterrez subit, affin qu'ilz n'infectent l'air. Ceux qu'il les iettent par les rues, sont dignes de cruelle mort : à cause que les gens sains sont infectez par iceux. Aussi faut faire guet sur aucuns meschans, qui gettent par les rues, linge, bouquetz, emplastres, & autres choses infectees, & les punir, cōme homicides. Quāt à l'aposteme pestilent, lors qu'on voit qu'il vient à suppuratiō, ne faut point attendre là par faicte maturation : mais la faut ouvrir vn petit deuant icelle : & lors qu'il sera ouuert, on doit appliquer quelque digestif qui ayt vn petit de detersion, comme celuy qui est faict de Therebentine, le iaune de l'œuf, & d'vn petit de Miel, & de farine d'orge : apre-

*Nota cōtre
les meschās
infecteurs.*

on peut traiter ces absces, ou bubo pestillent, ainsi que les autres phlegmons. Mais à cause, que l'Anthrax pestifere faict escarre, ou crouste, sera vtile d'appliquer choses de grande attraction, & leur faire bonne ouuerture, en appliquant au milieu d'iceux poudre de Cantharides, dissoute avec le Miel, & le iaune d'un œuf, ou vnguent *Egyptiacum*, & par dessus *emplastrum diachilon cum gummi*, & pour faire tumber l'escarre induite par iceux aydes, on doit appliquer beurre, sans sel, graisse d'oison, ou de chappon, ou quelque mucillage: puis faut mondifier le lieu avec le mondificatif de *apio Guidoni*, aut *Ioannis de Vigo*: Apres la mondification, quant aux progres de la curation, on pourra proceder comme aux autres Phlegmons. Et en ce cas en temps froid

Nota
les anthrax

est bon de faire feu de bois odorifé-
*Tumeur odorifé-
 rante.* rant, comme Laurier, Geneure, Sa-
 pin, Chesne, Rosmarin, & faire fu-
 migation de choses chaudes & odo-
 rifiantes, cōme de Giroffles, Storax
 calamite, Benzoin, Oliban: & en tēps
 chaud, sera vtil mettre en la chābre
 du patiēt des branches de Saux, des
 roseaux, de ioncs, fueilles de vignes,
 vlmaria, & roses: & en tout temps
 est bon le feu du soir & du matin. Et
*pour odo-
 re.* est prouffitable que le patiēt tienne
 en tēps chaud ou moderé, vn linge
 humecté en eauce rose, avec laquelle
 on aura mis vn petit de vinaigre, &
 de bon vin, & vn petit de poudre
 de Giroffles. En temps froid, on pren-
 dra du vin de bon odeur, avec bon-
 ne quantité de Giroffles & de Macis
 mis en poudre: puis on humecte-
 ra le linge dedans lediēt vin, puis
 on le portera pour odorer souuent.

L'vsan

L'usage de tenir en la main quelq̄ *Formule*
 pomme odoriferante est bien bõne, *odoriferan-*
 comme est l'ordonnance sequente. *te.*

Capias pulueris chariophyllorum ; benzoin, storacis calamite, maceris rosarum, santalicitrini partes equales : ladani puri, unius prædictorum : duplum ponderis stiracis liquide decimam partem unius prædictorum : ex eis formula rotunda paretur quæ quouis tempore ualde utilis erit omnibus, nisi in quibus cerebrum facile offenditur ab odoriferis. Quand il sera chaud entre deux repas, lors que le patient sera alteré, sera bon qu'il vse d'Orenge, ou de Citrons, avec le Sucre & caue rose, ou de Grenade mese, ou acide. Et quant aux viandes & raison de viure, le patient doit obseruer ainsi qu'auons escrit en la partie preseruatue. Et par tout le decours de la maladie, le patient pourra vser de l'Ele&uaire sequent

sequent en la forme que s'ensuit.

*Electuaire
utile en
tous temps.*

*Accipias cardi benedicti siccati, semina
nis citri fragmentorum hiacintibi pulve
ris teste canori flumialis, ossis de corde
cerui, margaritarum, croci, maceris, cina
namomi selecti, rasura eboris, partes e
quales: radice imperatoria, siue angelica
ce partem dimidiam unius prædictorum,
sacchari ex aqua buglosse dissoluti quã
tum satis est: formetur electuarium in ta
bulis ponderis unius denarij.*

Le moyen d'vser de ces tablettes, est
d'en prendre vne de matin, deux
ou trois heures deuant desjeuner,
ou deuant le soupper, & sont aussi
vtiles pour la preservation, en con
fortant le cœur, le cerueau, & l'es
tomach. Ceux qui ne peuuent a
voir ce remede, prendront souuent
du Bolus armenius, en eue rose, la
ué & seichê, avec la dixiesme par
tie de racine de Angelica, en yue

avec vn petit de vin : & en esté avec
 eaue de Surelle, ou decoction d'i-
 celle. On pourra aussi vser de la-
 dicte poudre, avec le double d'icel-
 le de sucre rosat. Les pauvres au- *pour les*
 ront recouts à la Tiriaque diarasse- *pouures,*
 ron, en yuer : & en esté & temps mo-
 deré, à ladicte poudre. Et quant à la
 purgation, la Reubarbe, en esté, est
 fort excellente, donnée en deuë quan-
 tité : & en yuer l'Aloës, & la *hier-*
apica Galeni. Et pour les pauvres, les
 pilules communes, escrites en la par-
 tie preseruatiue, & ne suis d'aduis,
 qu'on vse de la pilule de Ioannes de
 Vigo, où il entre du *precipitatum*, *Notādum*
 ny en ceste maladie ny en autre : car *de pilula*
 elle est venimeuse, destruisant l'es- *peffima.*
 prit vital, euacuant les bons hu-
 meurs, avec les mauuais. Le Syrop
 fait de plusieurs infusions des roses
 de Prouins, donné à la quantité de
 deux,

deux ou trois onces, avec vne dragme ou deux de bon Reubarbe, est vn remede excellent en esté & tēps moderé. Les pilules Imperiales sont bonnes en tout temps, & doiuent estre prinſes du matin, long temps deuant le manger. Apres la phlebotomie & la purgation faite par art ou par nature, est chose ſinguliere & bien approuuee d'vſer du remede ſequent, lequel prouoque à ſuer abondamment: c'eſt qu'il faut prendre vn quarteron du bois nommé *Gaiacum*, demy quarteron de Peſcorce d'iceluy, de la racine de *Cardo Marie*, qui eſt tachetee de blanc, qu'on appelle auſſi *Cardo maculatus*, vne once racine de Bugloſſe, & de Pimpenelle, de chacune demie once, des ſucilles de *Cardo benedict* vne poignée: on fera bouillir le tout en deux lotz ou deux quartes d'eau

à petit

*Decoction
utile.*

à petit feu, tant qu'ilz viendront à moins d'un lot : lors on y adiouftera vne pinte de vin blanc petit, & odoriferant, & le faudra bouillir derechef vn bouillon : & laisser le tout ensemble cinq ou six heures, puis le couler. Le moyen d'vser de ce remede est, qu'il en faut prendre vn bon verre, ou la quantité de six ou sept onces moyennement chaud, en son liect, du matin ou du soir, loin du repas : & se faire couvrir assez fort : & faut que le patient endure la sueur, par l'espace d'une heure, ou environ s'il luy est possible : lors doit auoir quelqu'un qui l'essuye doucement par tout le corps, & vne heure apres pourra manger quelque viande de facile concoction, selon la saison. En ce cas aduient souuēt tréblement de cœur, & lors apres auoir fait les remedes principaux est bon d'epithimer.

*Remede
prouoquant
à suer.*

*Epithimer
cordialis.*

mer.

mer, la region du cœur, avec eau de Surelle, & de roses, avec lesquelles on mettra de la poudre de Macis, de Santali citrini, vn petit de bon vin, puis faut mouiller vne piece d'escarlate en ladicte liqueur, tie-de, & l'appliquer sur la region du cœur, deux ou trois fois le iour, loin du manger. En ceste maladie aduient souuent grand vomissement, qui debilité l'estomach. Pour secourir lors à la debilité de l'estomach, est utile de faire fomentation, avec le vin rouge, avec lequel on aura fait bouillir *Absynthium Romanum*, roses, Mariolaine, & fleurs de Rosmarin: puis incontinent apres sinapiser poudre de Mastic, & de Macis. Et pour reuoquer l'appetit perdu, en temps chaud, ou moderé, le patient viera d'Orenge, avec eau rose, & sucre, ou de pommes de malignes,

*Fomentum
stomathi-
cum.*

gnes, qui sont acides ou aigrettes
 trenchées bien delies & mises en vn
 voirre plain d'eau venant du puis
 ou de la fontaine, aussi en tout temps
 pourra vser d'oliues bien dessalees.
 Pour obuier au somne profond &
 pesanteur de chef, n'est chose plus
 vtile que diuertir les vapeurs corru
 pus par clisteres assez forts & attra-
 ctifs, comme celuy qui est fait de
 mercuriale avec brionne & centau-
 re: avec bonne quantité de miel. On
 recouure de ces herbes facilement,
 & quasi en tout temps. Et pour c'est
 affaire est bonne l'inuention des in-
 strumens de cuir ronds ayans deux
 formules de bois, à l'une desquelles
 on peu mettre la bugette, ou canne
 de l'instrument, & ne se faut que as-
 seoir doucement sus ledit instrumēt
 pour prendre ledit clistere sans aide
 d'autruy, & sont les clisteres en tout

*Clystere
 attractif.*

*Nota.
 pour les
 clisteres.*

temps vtils ; tant pour la preservation que pour la curation , & mettrons fin a ce traitté de peste, en aduertissant le chirurgien qui veult aller en vn camp militaire , qu'il porte ce liure avec soy , pour se conduire selon la doctrine que auons donnee. Et que le gendarme porte avec soy de la racine d'angelica, du macis entier , ou de la racine de zedoaria ; pour tenir souvent en la bouche pour sa preservation. Et qu'il porte du cardon benedict, racine de liône, ou de la cardo Mariae, pour faire boullir en eauue avec vin blanc subtil & non doux pour prendre , lors qu'il est touché de la peste, soy faisant couvrir & suer. Ce remede est fort vtile : mais plus prouffitabile apres la saignee, ou clistere, que deuant iceux. Je me suis arresté en ce cas a descrire les aides bié

experimentez sans multiplier plusieurs ordonnances qui induisent plus tost confusion que vtilité, par lesquelz remedes à l'aide de l'hauteur de vie nostre redépteur & preseruateur Iesus Christ, plusieurs ont esté & seront preseruez & guaris, au quel soit honneur & gloire in secula seculorum. Amen.

LA CURATION METHODO-
dique du Dysentère, ou Cas
que sangue.



N ceste derniere Partie de ce petit liure no^mmetrons la curatiō de la maladie contagieuse nommee dysenteria laquelle comme recite Galene au secōd de sa methode a' prins sa denomination à l'esa particula, nam *Εντέρα* Grece Latiné *intestina dicuntur*, & en François signifie

difficulté ou tourment d'intestin.
 Et commencerons la curation generale, laquelle consiste en vraye methode par la definition d'icelle. Dysentere proprement est vlcération de intestins avec douleur & avec egestion sanguinolente, & est appellee caquesangue des Italiens ab *accidenti*, à cause des egestions meslees avec le sang. Ceste maladie est causee le plus souuét de cholere mordante venant du foye ou de tout le corps, laquelle en passant par les intestins, les escorche & fait vlcération. Elle vient aucune fois de cholere aduste, ou d'humeur melancholic, ou de flegme false: celle qui prouient de cholere aduste ou suc melancholic est iugee mortelle d'Hippocrates disant, *Dysenteria si à felle nigro incipiat lethalis*. Et Galene exposant cest aphorisme dit

que

definition
 de dysen-
 tere.

causa hu-
 morbi.

que telles vlcères procedantes de cholere noire sont toutes malignes & tiennent la nature du cancer: parquoy son pernicieuses. Ceste maladie en vn camp, à souuent sont commencement de cause exterieure, cōme l'vsance de viandes corrompues ou mal preparees, de l'caue infectée par pūtrefaction de bestes mortes; & de l'air infecté par icelle: & par les corps humains gisans sur la terre ou a demy enterrés. *La cause externe.* Au commencement de ceste maladie, la partie superficielle des intestins est corrodée par l'acrimonie de l'humeur pechant, qui passe par iceux, & lors que la premiere tunique d'iceux est erodée sont ouuertes les veines desquelles sort le sang, avec les excremens, & aucunes fois tout pur. Si les menus ou graciles intestins sont vlcérés, la douleur est plus vers

la region du fond de l'estomach, & si la maladie est aux gros intestins, la douleur est plus vers le petit vêtre, & est le sang plus meſlé avec les excremens, la douleur est plus aguë, la fièvre plus vehemente, la soif plus grâde en ce cas auoir discretion de ſçauoir en quel lieu conſiſte ladicte maladie, par les ſignes deſſus-ditz, est vraye methode: car autrement doit estre guarie, celle qui conſiſte aux menus ou graciles intestins, que celle qui est aux gros intestins: & est ceste indication prinſe de la ſituation de la partie leſee. Donques celle des graciles intestins requiert estre guarie par medicamens prins par la bouche. Et celle qui conſiſte aux gros, par iniection faite par cliſteres. Et pour ce que l'eſſence de ceste maladie conſiſte en ſolution de continuité, il est certain que pour la cura

tion

ſignes diſſi.

Quarto
Methodi.

tion elle requiert vñition des parties
 vlcerees , & pour icelle parfaire ,
 sont adhibez tous remedes: & ce ap-
 partient à la partie curatiue, comme
 l'euacuation des humeurs mordans,
 qui decouurent à la partie lesee: qui
 peuuent faire ou augmenter icelle
 maladie, appartient à la partie pre-
 seruatiue: Donques la curation de la *Morbi.*
 maladie faite, sera parfaite par les *facti cu-*
 medicamēs qui ont faculté & puis- *ratio.*
 sance de vñir & ioindre les parties
 separees, mais les vlcerees qui sont
 latentes es parties interieures du
 corps, requierent plus grande con-
 sideration & diligence, que celles
 qui sont euidentes: & au dehors,
 comme recite Galene au premier li-
 ure de locis affectis, & deuant que
 les aides prins par la bouche, paruiē-
 nēt aux intestins, il sont diminuees, &
 leur action & vertu: parquoy faut

que les medicamens soyent de plus grande siccité & vertu, que s'ilz estoient immediatement appliquez sur lesdictes vlceres. Le medicin, ou chirurgien qui considerera bien ces indications, en obtiendra honneur, & les pourceus patiens en auront le prouffit, moyennant la grace de l'auteur de tout bié nostre redempteur Iesuchrist, auquel soit honneur & gloire à tout iamais.

S'EN SVIT LA PARTIE

*operatiue, ou pratique de Dys-
sentere, ou Caques-
sanguie.*



Quand ceste maladie comence comme on doit cognoistre par ces propres accidens, lors on doit premier considerer si le corps abonde en sang, & si les vaisseaux
sont

sont replets: & si ainsi est, cest chose
 tresvtile douvrir la basilique au bras
 droit, en faisant petite ouverture, à
 fin que le sâg subtil & la cholere puis-
 sent sortir. Et par ce moyen est faite
 bonne diversion des humeurs, qui
 pourroyent augmenter ladite mala-
 die, & suffit de tirer troys ou qua-
 tre onces de sang pour ladite reuul-
 sion, à fin que la vertu soit plus for-
 te pour résister à la vehemence de
 ladite maladie, combien que en ce
 cas on n'est point accoustumé d'en-
 tamer aucune veine, & qu'il semble
 ra à plusieurs estre quelque parado-
 xe, touchant la curation de ceste ma-
 ladie. Et si le medecin n'est point
 appellé au premier ou second iour
 que ladite maladie aura inuadé le
 patient, ou que le patient soit *Ai-
 μέπος* Ⓞ, id est, *mittendi sanguinis timi-
 dus*, lors on doit commander au pa-

Nota.
sur la phle-
botomie en
ce cas.

La diete tient, qu'il viue sobrement, tant en
utile. boire comme en manger, en ostant
 le vin: & est bon que le patient boi-
 ue eau boullie, ferree avec quelque
 syrop adstringent, comme est celuy
 de mirtilles, de *berberis* ou de *cidonijs*
 ou eau ferree blanchien avec aman-
 des: le lait d'amandes preparée
 d'eau ferree, bien substantieux a-
 vec le sucre rosat, ou avec vn petit
 d'eau rose est utile par tout le de-
 cours de ceste maladie. Les herbes
 utiles pour alterer le bouillon de la
 chair, sont la surelle, les fueilles de
 plantain, de *oxiacantha*, nommé *ber-*
beris, ou espine vinette, les faire
 laitues, la scariole, & au lieu d'icelles
 on peut quelque nodule ou poulpe,
 a tout amandes cassées, sumach,
berberis, semence de plantain, de
 pourpier, ou pourcelaine, pour met-
 tre boullir avec la chair, de la poul-
 pe de

pe de la poitrine du chappon alter-
ree: avec les choses susdites on en
fera coulis assez espes: & au lieu de
sucre on mettra vn petit d'eau ro-
se. Deuant le past est vtile cōdit de
coing, ou de sirop d'iceluy, & en la
fin la poire rostie nō sucee, ou les a-
mādes preparees avec eau rose, &
les viandes susdites ne doiuent point
estre prises chaudes, mais froi-
des, ou tirant à froideur. Ceux qui
sont au camp pourront manger du
lait boulli, avec lequel on aura estaīt
plusieurs foys vn caillou cler, & la
pierre nommee pirites, ou quelque
pierre belle & clere, qu'ō trouue sou-
uent par les riuieres, & beueront de
l'eau boullie avec fueilles de plan-
tain, ou de ronce, ou de fueilles de
mesplier, & doit le patiēt cūter cour-
roux, melancolie, & soit coy sans de
ambuler, car par tout le decours de

*Nota de
l'exhibition
de lait.*

la

la maladie, le repos & le dormir s'ont deux choses fort vtils. Quand aux remedes des le commencement on doit regarder d'euacuer l'humeur pecheant prudẽtemẽt, en eul- tant toute medicine ou entre diagre de, colochinta, agaric, & semblables: mais faut vser de celles qui purgent doucement sans agiter les humeurs: & qui delaisent apres leur operation quelque vestige de stipticitẽ, cõ me est le reubarbe, ou les mirabolans, doucemẽt dessechez sus le fer moyennement chaud: donnez en deue quãtitẽ, avec decoctiõ de plantain, ou de hippuris nommee vulgairẽment queue de cheual, ou de piloselle. Et pour ce qu'en ce cas il y a souuent obstructiõ des veines meseraiques, sera fort vtil d'vser de choses apertives qui ont en soy quelque adstrictiõ & proprietẽ de guarir des

vice

*Nota sur
la purga-
tion.*

ulcères interieures : & auons tous-
 iours trouué de grande efficace la
 piloselle & l'aigrimonie, que est ue-
rum eupatorium, les sucilles de cario-
 philata, & les racines de plantain:
 on doit boullir icelles herbes en
 eau, & donner a boire entre deux
 repas de ladicte decoction, & se-
 ra bonne aide aux pouures gens &
 aux gendarmes, a cause qu'on trou-
 ue desdictes herbes quasi par tout.
 Nous auons trouué aussi vtile la pou-
 dre de la piloselle seichee douce-
 ment en vn papier sur le gris, dōnee
 la pesanteur d'vn escu, avec deco-
 ction de plantain. Et entre autres re-
 medes est vtile de sa proprieté le
 foye, de l'oultre, il le faut couper par
 pieces, puis le l'auer en vin blanc: &
 apres le seicher au four, & le garder
 pour faire poudre, & auons accou-
 stume d'en donner au patient la pe-
 sant.

*Choses ape-
 ritues a-
 uec stipti-
 cité.*

*De piloselle
 la notan-
 dum.*

*Du foye de
 l'oultre.*

santeur d'une dragme, ou d'un escu, avec decoction de plantain, ou d'aignimonie du matin: on doit aussi en tel cas, porter avec soy poudre de escreuisses fluviales, & bolus armenius, laué en eau rose, ou de plantain, à cause qu'ilz sont bons tant en ce cas comme à la preservation & curation de la peste. Pareillement est du coral & corne de cerf bruslés & puluerisés, & de la pierre *ematites* ou *sanguinaris*, donnés comme les remedes dessusdits. Par les parties exterieures est vtil d'oindre la region de l'estomach & tout le ventre inferieur d'huile rosat chaude, avec lequel on aura aiouisté quelque quantité de mastic, & ce par deux ou trois fois le iour. Et ne faut oublier, que les clisteres sont de grande vtilité, quand l'ulcere est aux gros intestins: & doit encommencer par

*Vnction
vtil.*

cli

clystere lauatif, ou deterfif, comme *Clystere lauatif.*
 est fait de decoction d'orge, avec
 roses, hipericon; & le miel rosat: &
 doit estre dōné tiède: car la chaleur
 a&uelle esmeut les humeurs, & deux
 ou troys heures apres on doit don-
 ner vn autre Clystere adstringent,
 comme celluy qui est fait de deco-
 ction de *synphitum*, ou consolida *Clystere co-*
solidatif.
maior, plantain, poligonum, roses,
 agrimoine, hipericon: avec laquelle
 on adioustera *sanguis draconis*, du *bo-*
lus armenius, & graisse de bouc ou
 de cheure. A ceste intention est
 vtil le clystere fait de l'ait, avec le-
 quel auront bouilly les herbes susdi-
 tes sans sel, & sans huile. Et si la
 douleur est v&ehemente, on bouillira *Sedatif de*
douleur.
 avec le lait des fueilles de pauot, ou
 de la semence d'iceluy, avec lesdi-
 tes herbes. Plusieurs do&cteurs
 louent l'application d'vn petit suppo-
 sitoire,

*Nota dum
de narcoti-
co.*

fitoire, fait de storax calamita, avec lequel on adiouſtera la dixieme partie d'opium, & doit le dit ſuppoſitoire auoir vn filet pendant au dehors à fin que lors que le patient commencera a dormir : on le puiſt tirer hors, & eſt le dormir treſvtil en ce cas. Parquoy ſus la nuit ſera bon de dōner du lait d'amandes eſpes, preparé à tout l'eaue ferree, & avec ſemence de pauot blanc. Pareillement eſt bonne l'application de populcon auquel on adiouſtera vn petit d'opium, & ce ſeulement ſus les temples du ſoir, & lors que le patient cōmencera a dormir, faudra oſter l'emplatre : & pour conſequence ou que ſoit l'vlceration. Par tout le decours de ceſte maladie ay trouuē bon remede de faire boire au patient, de la decoction de pentaphillon, argentine, & plantain, & donner vne heure

*Decoction
vtil en
tout temps.*

de

deuant le repas demie cuilleree de
 Coriandre preparé par trois iours
 avec caue rose, & doucement sei-
 ché en vn papier sur le gris, & ainsi
 faisons la fin à ce petit liure, dont
 honneur, & gloire en soit à
 tousiours à l'Autheur
 de vie Iesus
 Christ.

AV CANDIDO LECTORI.

Candide Lector, quisquis ex hoc li-
 bello fructum perceperis, bene pre-
 care Imperatori Carolo huius nominis
 Quinto, in cuius ac Reipublicæ
 gratiam, hunc libellum
 primò conscri-
 psimus.

L

LES ERREURS

des Chirurgiens, observez & redigez par escrit, par le dessus nommé Maistre Nicolas Goddin, Docteur en Medecine. A tous Chirurgiens, qui desirent suivre la curation Methodique des maladies, desquelles lesdits erreurs font mention.

LE PREMIER ERREUR

est touchant la maladie, nommee en Latin Lues venerea, en

François la contagion Venerique.



Usques au temps present on a grandement erre en la curatiõ de la contagion venerique principalement au cõmencement d'icelle, fai

le, faisoit phlebotomie de la basilique dextre ou senestre. Au commencement de ceste maladie se monstrét cõmunément rougeur avec quelque petit vlcération au mēbre viril, ou excoriation du cõduit de l'vrine, laquelle paruiet iusques vers le col de la vessie: & souuent avec lesdits accidēs suruiet absces es aignes, apres en aucūs naisset pustules de diuerses figures, & taches de diuerses couleurs solõ les tēperatures & humeurs abõdās es corps des patiēs. Il est certain, que quasi tous les Chirurgiens vulgaires, au commencement de ceste maladie donēt quelq. medecine solutiue vehemēte, cõme est coloquinte, confectiõ amech, ou autre: puis lendemain entamēt la basilique du bras dextre, ou senestre, & apres viennent aux vnctions, ou iuffumigations. Et certes iceux cõmettans tel

erreur, sont cause d'attirer le sang & autres humeurs infectez de la contagion vers les parties nobles; lesquels sentans le noeuement d'iceux, les renuoyent en diuerses parties du corps, lesquels apres engendrent vlcères phagedeniques & rebelles à curation: & s'y engendrent tophes & nodositez adherantes aux os, lesquels par malignité indicible, viennent à faire carie & corrosion aux os; avec douleur qui donne grande affliction aux pures patients, & communément plus la nuict que le iour. Or nous auõs deliberé selon nostre petit iudice, donner quelque petit de Methode, laquelle contréuendra aux erreurs que nous auons deliberé de corriger. Donques au commencement de ceste cõtagieuse maladie, faut commencer la curation pour euacuer le corps, avec les solutifz

lutifz qui mondifient le fang, & propres selon les tēperatures des corps: & ce en vſant de preparatif ſelon leſdiſtes temperatures & humeurs pechans. Parquoy doit le Chirurgien recourir à quelque doctē Medecin: car en ce cas nature doit régler la medecine, non pas la Medecine nature. Apres eſt choſe bien raifonnable & vtile, d'ouuſir la Saphene au pied dextre, ou fenestre, ſelon que l'abcès ſe demonſtre, ou ſ'il n'y a point d'abcès es aignes; ſelon le iudice du Medecin, ce faiſant, on fait reuulſion, laquelle tire le dit fang & humeurs infectez arriere des parties principales. Sur l'abcès on doit toujours appliquer choſes mollificatiues, & attractiues, pretendant le faire venir à ſuppuration: & icelles indications accomplies, faut que le patient vſe de la potion, faiſte ex

ebeno gaiaci: preparée selon les températures, & humeurs pochans, & ce par l'espace d'un mois, ou environ. Et combien qu'aucunes gens doctes soyent d'aduis, que la portion gaiacine se doit faire sans admixtion d'autres medicamés, neantmoins auons trouué que l'admixtion de plusieurs simples conuenables, adointe selon bon iudice, ayans regard à diuerses maladies, ont produit meilleur effect que la decoction du bois seul: combien que le decret d'Alphonfus Ferrus, qui vse de la decoction de ce bois en toutes maladies, est du tout ridicule: lequel en vse *in pthisi, etiam si dijs placuerit in senio Philippi*. D'auantage ont erré grandement ceux qui ont mis en auant le bois de l'eschine fort cher & inutile, & du tout insipide. Et par dessus tous ont erré insulsemment, ceux qui ont mis en

vſance

*Alfonſus
Ferrus.*

usage de faire la diette, avec la decoction du buisset, qui est vn bois adstringét, puant & ennemy aux parties principales. Et certes entre tous les arbres, que nous a donné le Createur en nostre Gaule Belgique, il n'y a nul qui approche plus a la nature du bois de Gaiac, que le fresne, lequel ouure les obstructiõs du foye, de la ratte, & des reins: & scay quelqu'vn, q̄ avec la decoctiõ du fresne a recouuert santé, apres auoir fait les choses vniuerselles requises en ce cas.

LE SECOND

Leur, est touchant laditte maladie, lors qu'elle est conseruée

mcc.

Ors que l'occasion de guerir ceste maladie par les remedes suscripts, est perdue, par l'ignorance

L 4

ce des Chirurgiens, ou par la negligence des patients : encoré commettent nouueaux erreurs les Chirurgiens vulgaires, en donnant solutifz violents, sans preparer les humeurs pechans à expulsion, qui apres font nodositez, vlcères malignes : & qui pis est, lors qu'il y a plusieurs vlcères tophes, & nœuds, ilz sont si ignorans, que subit apres qu'ils ont exhibez lesditz solutifz vehemens, ilz font vnctions ou parfums, deuant qu'ilz ayent mundifiez lesditz vlcères, & oste la carie des os : parquoy encourent souuent grand deshonneur. Car les douleurs retournēt au bout de quatre ou cinq mois au parauant : & apres reuiennent iceux vlcères, & carie es os.

*Error in
vnctione.*

D'auantage, ilz commettent erreur, touchant l'vnction, quand ilz oignent la teste, la region du cœur, la

region

région de l'estomach, les hypocondries, & fociles des jambes, contre toute raison, faisant vñction vniuerselle. Parquoy lors que ceste maladie est confermee, & qu'il y a vlcere, tophes, ou nœuds, c'est la plus seure voye, de biē modifier lesdits vlcères, & d'ouuir les nœuds, avec caustique, fait de fort capitel, cendres de feces de saouñ, formés avec vitriol bien brullé, & puluētisé: puis apres que l'escarre sera tronché par le milieu avec la pointe du rasoir iusques aux os erodés, est bon de mettre en fond pouldre de *precipitatu*, ou plumaceaux imbus de *basilicon*, & *precipitatu* meslés ensemble: puis faut ruginer les os erodés, & lors est le temps propre à faire inunction, avec les vñguens, on entrent les axunges, gommes, mineraux, huilles lointes avec le Mercure en suffisante quantité.

tité, en adioustant avec l'onguent tri-
 riague fine, & bon mitridat. Et suffit
 d'oindre les espaules, les muscles du
 dos & lombares, les hâches, les cui-
 ses, les genoux, coudes, & extremi-
 tez. Et faut auoir discretion de cesser
 l'unction, lors q̄ les mandibules sont
 esseues & douloureuses; & qu'elles
 cōmencent à rendre la matiere sali-
 uale & pituiteuse, ou que le flux de
 ventre leur suruient. Et ne faut auoir
 en horreur les aydes ou entre le mer-
 cure, moyennant qu'on en vse pru-
 dement: car par iceux cent mille
 personnes en ont esté bien & seure-
 ment gueris. Et apres que le flux est
 cessé, est oportun d'vser de la deco-
 ctiō du bois de ebene, de gaiac deuē
 ment preparé avec le vin, ou sans
 vin: seul, ou avec autres simples se-
 lon le iudice du medecin. Chirurgiē
 docte & experimenté. Quant à l'ex-
 hibiti

*Tempus
 tendi de-
 octo ligno
 anti.*

hibition du precipitat par les parties interieures, plusieurs y ont admis erreur pernicieux, & y ont encouru du grãd deshõneur, ceux qui par temerité audacieuſe l'ont donné en pilules ou autrement, & ont eſté cauſe de la mort de plusieurs, parquoy on ne doit iamais uſer dudit ayde par dedans.

Error in præcipitati exhibitione.

LE TIERſ ERREVR

est touchant les coups pe-

netrans en la poi-

trine.

Il aduient ſouuent que es playes penetrantes en la cavitè de la poitrine, qu'il deſcend grand quantité de ſang au fond d'icelle, qui reſoſe ſus le diaphragme, lequel par ſa grauité, oppreſſe ledict diaphragme, & comprend mauuaiſe qualité en ſoy putrifiant, & com-

prime

prime les poulmons, & par la putre-
 faction d'iceluy qui est cōmuniquee
 au cœur, est causee la fiere eōtinue,
 qui maine les patients à la mort, vers
 le dixiesme iour. Or les Chirurgiens
 vulgaires, n'ont point consideration
 de cest affaire, & par leur ignorance
 le patient est destitué des aydes, par
 lesquelz il pourroit paruenir à gue-
 rison. Donques lors que tu verras
 que la playe sera penetrante à la ca-
 uité du thotax, ou poitrine, tu con-
 sidereras s'il n'y a point de sang de-
 scendu vers le piéd du diaphragme,
 laquelle chose tu congnoistras par la
 difficulté de respiter, par la puanteur
 de l'alaine, par la relation du patient,
 qui sent iceluy sang mouuoir de lieu
 en autre, & a le patient souuent en ce
 cas la face rubicōde, par les vapeurs
 qui montent à la face, & couche plus
 indolentement, sus le costé où re-
 pose

pose ledit sang, que sus l'autre, à cause qu'iceluy sang comprime les poulmons & diaphragme. Parquoy en ce cas, faut que le Chirurgien soit diligent de cōsiderer les signes dessus-dits, & ce pendant que la vertu du patient est encore bonne, est besoin de faire contre ouverture entre la quarte & cinquiesme coste à la distance de six ou sept doigts de l'espine du doz. Le rasoir duquel on doit faire l'ouverture, doit estre petit, biē tréchant, duquel petit à petit & doucemēt, on doit trancher *mesopleuria*, ou muscles intercostaux, & se doit faire tousiours icelle section, en conduisant le rasoir vers la partie inferieure desdits muscles intercostaux car les veines, qui nourrissent lesdits muscles & les nœuds qui leur donnent mouuement, & sentiment, suivent plus la positiō de la partie haute que

te que de la basse. Par ce moyē apres que ladite ouverture est decentemēt faite, on euacuē le dit sang corrompu, petit à petit selon le iudice du Medecin Chirurgien, ou du Docteur assistant, & suffit d'en tirer deux fois le iour cinq ou six onces à la fois. Et en ce cas les potiōs vulneraires sont bien vtiles, desquelles les docteurs practiciens ont parlē assez amplement. Et par ces moyens subscries, à l'ayde du Createur en auons gardē quatre pour vn an, lesquels sans ledits aydes fussent decedez certainement, & en ont rendu graces à Dieu, donateur de l'art de chirurgie.

LE QUARTIER REVR

est touchant l'application des
 tripanes, on terebelles, es
 fractures des os de
 la teste.

Nous auons veu souuent com-
 mettre erreur touchant l'appli-
 cation des tripanes, es fractures du
 crane, principalement quand l'os
 estoit cassé en diuerses pieces, d'au-
 tant qu'ils n'auoyent point la con-
 sideration qu'iceux os diuisez, les-
 quelz ont petite resistence, obeissent
 à la reuolution de laditte Tripane:
 parquoy est souuent lacerec la dure
 mere, & par la dilaceration dicelle,
 sont causez le plus souuent accidens
 qui mainent les pauvres patients à
 la mort. Pourtant en ce cas faut
 auoir bonne consideration, de-
 uant que appliquer les Tripanes:
 car si on peut avec scalpres excisoir-
 res esleuer vn des os fracturez, on
 aura facilement les autres sans tri-
 paner. Et auons souuent trouué vtile
 en tel cas, vn instrument, lequel à
 son extremité, est de figure lunaire,

tel que ont accoustumé d'vser ceux qui taillent les petites medailles de bois, qui taillent bien, & petit à petit font bonne impression en l'os du crane, sans vexer les parties subiectes: & ay plusieurs fois prohibé d'appliquer les tripanes au prouffit des patients, & à l'honneur de la Chirurgie, là où les Chirurgiens vulgaires estoyent du tout deliberez d'appliquer lesdictes tripanes. Et en y a plusieurs ignorans qui sans iudice appliquent les tripanes en toutes parties de la teste, sans considerer les lieux des commissures, & sont cause de la mort des pauvres patients. Pour ce, tout Chirurgien doit considerer diligemment ces affaires, afin qu'il traite son art selon Methode & verité: & qu'il en rende grâces au Createur.

LA QVINT. ERREVR

est touchant la pointure

des nerfs.

Quand quelcun est blessé de pointure de neif, si ce n'est qu'il loit pensé par quelcun qui soit institué en l'art de chirurgie, il est en grand danger de venir à conuulsion laquelle fait mourir plusieurs patiés, comme aduient souuent à ceux qui sont pensez par aucuns chirurgiens vulgaires & gens ignorans, lesquels au commencement pensans bien besogner, font fométatió d'eau chaude, avec lesquels ont boullis, malues, violaria, & semblables : puis apres la fomentation appliquent seló leur coustume inutile, vn commun sedatif de douleur, fait de mie de pain blanc, de strempee avec le jaune de l'œuf, & huile de chamamille,

ou rosat : lesquelles choses sont du tout ennemies aux pointures des nerfs, d'autant que par l'application d'iceux sont remollis les parties nerveuses; & est retenue la matiere qui decourt esdites parties, & est augmenté l'absces qui communement aduient en ce cas. & par continuation est impartty le mal au cerueau, duquel vient apres conuulsion & consequentement la mort. Donques pour euitter tel danger, en suyuant la curation raisonnable, faut auoir regard de purger le corps decentement, & si la vertu est bonne de faire phlebotomie reuulsue, ou voisine, selon le iudice du docte medecin, lors pour euoquer la matiere impaëe & imbuë au nerf point, faut eslargir l'orifice de ladite pointure, à fin que la vertu des medicamens puisse mieux penetrer au profond:
& que

& que la sanie subtile puisse estre
euoquee au dehors. Et en ce cas a-
uons trouué bien vtil huyle de hype-
ricon , préparé avec la gomme de
sapin, nommé therebentine de Ve-
nise , & sur vne once dudit huile,
faut mettre demy scrupule de eu-
phorbium , puis le faut appliquer
chaud à tout vn plumaceau, & met-
tre dessus emplastre, fait avec pro-
polis, gomme hammoniac , & cire,
en decente quantité: par ce moyen
on attire la matiere imbibeé aux
nerfz ou aux tédós aux parties exte-
rieures, laquelle induiroit phlegmó,
douleur intense!, & apres conuul-
sion. A ceste intention auons vsé
d'vnguent fait d'huile de lin, & d'eu-
phorbium de chascun egalemeñt, a-
uec la vingtiesme partie de souphre
puluerisé avec decente quantité de
resine de pin & de cire. C'est vngüet

excite chaleur mediocrement, il attire & desseiche, & est de subtiles parties, parquoy est de bon effect en ce cas, par lequel a l'aide de nostre seruateur Iesuschrist, le chirurgien prudent pourra auoir honneur, & les poures patients ayde & secours.

L'ERREUR VI. EST TOUCHANT
la curation des hernies
ou ruptures.

Nous auons plusieurs fois veu ceux qui se meslent d'inciser la pierre & rupture ou hernies, abuser tresgrandement le peuple, touchant la cure des hernies ou ramices, d'autant que par leur grande auarice ont fait incision, & ont extirpes le testicule, en hernie aqueuse ou yenteuse, laquelle chose est du tout contre Dieu, & toute raison: & iceux malheureux & meschans com-
 met.

mettent cest erreur souuent sur les hernies des petis enfans, a cause que es hernies aqueuses & veteuses de ceux qui viennent ou sont en aage virile, on cognoit euidement, qu'en tel cas tel erreur seroit trop euident. Pour ce suis ie d'aduis que chascun qui a quelque enfant ayant hernie de quelque espeece qu'elle soit, que premier que le mettre au danger de perdre le testicule, ou de la mort, qu'on monstre lesdites hernies a quelque medicin, ou chirurgien scauant, lesquels congnoistront facilement la difference de celles qui sont aqueuses ou veteuses, alencontre de celles qui sont intestinales, ou omentales. Et certes nous auons veu que des hernies petites qui prouiennent de la relaxation ou diuision du peritoneum, plusieurs este guaris avec les medicamens coglutina-



tifz : & n'a esté be-
soin d'extirper le te-
sticule , principale-
mēt es ieunes gens.
Celles qui son de
moyēne grandeur,
en aage d'adolescē-
ce, ou virile, peuuēt
estre guaries par se-
ctiō & vstion de-
cētement faites , ou
par le cautere po-
tential, ou par l'ex-
tirpation du testicu-
le. Et à la reale veri-
té, la plus seure cu-
ration des hernies
zibales, ou intesti-
nales, est celle qui se
fait par l'applicatiō
du cautere actual, sur los pectinis: &
ce apres que lon aura fait incisiō sur
ledit

ledit os, avec rasoir, tirât le didyme vers la partie siluestre. Ledit cautere doit estre de figure lunaire, de l'espeſſeur de deux testôs ou enuirôn, aiant d'assiete l'espeſſeur d'un doigt, & les cornes en haut, à fin quil ne puist decliner à la vacuité du ventre : apres faut procurer que l'escarre tombe, & faire decente incarnation. La figure dudit cautere doit estre telle, qu'elle est figuree en ceste page : ayant decente proportion. Et doit auoir le manche vne palme de long, & le fer deux palmes. Chascun soit bien aduisé en tels affaires pour cuitter tels inconueniens, a fin que leurs enfans soyent guatis sans bieſſer nature, rendant grâces au Createur.

LE SEPTIEME ERREVR
vulgaire, est touchant la curation de angina, communement nommee

ſquinantie.

Souuent auons veu commettre
 Serreur pernicious, en la cura-
 tion de squinantie, tant de la part
 des patients, que des Chirurgiens:
 car les patients qui sont vexez de
 ceste maladie, ont de coustume d'e-
 uoquer incontinent quelque chi-
 rurgien pour faire phlebotomie.
 Or le chirurgien vulgaire mal insti-
 tué, à de coustume d'entamer les
 veines qui sont deffoubz la langue,
 sans faire reuulsion, laquelle cho-
 se est cause d'attirer le sang & autres
 humeurs vers la partie affligée: &
 par consequent l'absces est plus grand
 & pire, qui facilement maine le
 patient a la mort, parquoy en ce cas
 ne faut cheminer par la voye publi-
 que, mais est necessaire de purger
 premier le corps selon quil est be-
 soin, & faire phlebotomie reuul-
 sive, premier au plis du bras, ou a la

main de la veine cephalique, puis *Method*
 huyt ou dix heures apres; faut enta-
 mes les veines de deffoubz la langue
 par ce moyen on procedera metho-
 diquement à la cure, par lequel a l'ai-
 de de nostre Seruateur Iesus Christ,
 plusieurs seront seurement guaris,
 & luy en rendront graces perpetuel-
 lement.

Le huitieme Erreur, est touchant

la curation de hemicrania,

& de la relaxation de

vuula.

LA temerité d'aucuns chirurgiés
 habitans es pays d'Artois, & au-
 tres circonuoisins, a esté cause com-
 me auons veu plusieurs fois, de tres-
 grans detrimens a plusieurs patients,
 par l'imprudence des chirurgiens,
 lesquelz par leur temerité audacieu-
 se, ont souuentes fois entamé la vei-

ne du front, sans faire reuulsion
 es douleurs hemicraniques, & au-
 tres douleurs de teste, par laquel-
 le phlegbotomie impudemment
 & imprudemment faite, auons
 veu aucuns deuenir auengles, les
 autres deuenir sourds, & autres
 perdre l'vsance de raison: pour-
 ce en ce cas on se doit bien gar-
 der d'entamer icelle veine du front,
 que premier on n'ayt ouuert la ce-
 phalique au bras ou la main cor-
 respondante a la partie du chef,
 qui est la plus affligee, *ex hoc est re-
 uellere per communes patienti parti-
 cula uena.* Et en ce present chapitre
 ie veux narrer vn erreur fort ridi-
 cule, qui est commun à Valencien-
 nes, & es lieux circonuoisins: c'est
 que lors que les patiens on l'vuule
 relaxé, ilz ont de coustume d'in-
 ciser l'adite vuule relaxee, laquelle
 chose

chose on ne doit attenter que premier on n'ait fait bonne diligence touchant la curation d'icelle. Et maintefois me suis donné merueille, cōment à chascune fois que quel que ieune fille ou femme, vient a auoir la palle couleur, elles sollicitent les chirurgiens de faire incision de la partie inferieure de vuula, qui est du tout contre raison: car ladite palle couleur prouient communement de l'obstruction ou imbecillité du foye, de la ratte, ou de la matrice, *at pallor ille puellaris ad sui curationem longē generosius auxilium, & magis secundum naturā exposcebat.* Parquoy desormais iceux se doiuent garder d'exercer telle operation irraisonnable es corps des ieunes filles & femmes: car l'vuule fait beaucoup a la prolation de la voix articullee, comme on peut veoyr par ceux
 qui

qui l'ont perdu *ex lue uenerca*, ou autrement.

LE NEUVIEME ERREUR,
est touchant la curation de cancer,
soit qu'il soit ulceré,
ou non.

LE cancer qui commence à venir, est difficile à cognoistre, principalement a ceux qui ne sont bien exercitez en la chirurgie : pour ce le doctissime Galene fait vne analogie du dit cancer naissant aux herbes, qui naissent de la terre, disant q' apres qu'on a semé plusieurs herbes en vn iardin, que lors qu'elles sortent de la terre, ceux qui ne sont point bien exercitez en cest affaire, ne peuuent auoir leur cognoissance desdictes herbes sortans hors de la terre, pource est bien besoin que le medecin ou chirurgien soit de bon iudice, & de grâde consideratiô en

ce cas : car lors que le cancer est petit situé en partie carniforme, loing des grás vaisseaux, cōme sont les parties superieures, & siluestres de la cuisse, & des bras, & des espaules, on peut bié guarir ledit cācer, & ce par section & vstion, cōme auons veu faire à maistre Loys de la coste de saint Andrieu, homme bien expérimenté en la chirurgie pratique, a present chirurgiē du Roy de Frāce. Mais quant au cācer qui est situé en lieu occulte, cōme au siege, aux mēnelles, au palais, & parties du col, & dessoubz le genou, ou dessoubz les oreilles, faut croire le conseil de nostre bon pere Hippocrates, qui dit, que le cancer occulte ne demande point de curation. Et sur ce point le doctissime Galene declare, que la curation est double, c'est a scauoir, curation vraye, & curation palliatif-

tiue. Et certes touchant ce cas auons veu commettre souuent erreur par les empiriques, & gens ignares, mes mes apres que plusieurs patients s'ont venus vers nous, pour auoir conseil, & q̄ leurs auons conseilé qu'ilz vsassent de cure palliatue, en appliquant les metalliques & autres topiques decétemét preparees, par leurs folles promesses ont abusez lesditz patients, en appliquant déssus iceux cautere potential, ou en ouurant lesditz cancers avec la lácette, lesquels ont aduancé la mort des pouures patients, qui enssent peu viure encore lōg temps en vsant de cure palliatue. Quand au cancer vlcere, il est du tout incurable, & touchant icelui cōmettent les empiriques tresgrand erreur, en appliquant plusieurs medicamens: violens: ignorans que le cancer est de si maligne nature, com

me dit Paulus Egineta. *Vt mitiora remedia negligat, asperioribus uerò irritetur.* Et pour la palliation du cancer des lieux occultes, on doit iceux traiter prudemment, & y conuient tresbien *emplastrum ex pompholige*, apres qu'on a nettoyé le lieu vlcéré, & appliqué le ius de *lanccolata*, nommé le long plantain, ou de *climenô*, ou de *arction* nommée communement *lappa minor*. Je prie a tous lecteurs qu'il leurs plaise considerer que c'est de la noblesse de la vie de l'homme, & que quand par art de medicine ou chirurgie on peut prolonger la vie des poureux patients, on le doit bien faire: car pendât le tēps q nous sommes en ce mōde mortel nous pouuons auoir recours vers nostre pere celeste, & nous humilier à luy, le recognoissant autheur de tout bien, lequel a preparé a tous
 chre

chrestiens vn bien indicible.

LE DIXIEME ER-

reur est touchant la cura-
tion de herispe-
las.



LVSIEVRS chirurgiens ont commis erreur pernicious, en la curatiõ de herispe las qu'õ nõmé communement lorgueilleux, pour ce qu'il semble aux vulgaires que ceste maladie prouient d'humour furieux & maling, & accedent assez a la verité: car la cause d'icelle est vn Lumeur bilieux, ou sang subtil meslé avec lesdites humeurs, lequel est expulsé des partie interieures, aux parties superficielles, qui occupe seulement le cuir avec douleur, chaleur, rougeur, sans colle-
ction:

tion: mais s'estend & occupe grand lieu es dites parties superficielles, produisant fieures proportionnees aux fieures tierces. Or en ce cas est certain que incontinent que quelcun est touché de ceste maladie, il mande le chirurgien, lequel applique ius de plantin, ou de morelle, ou de cichoree, ou de semperuiuum, sans auoir regard si le corps à besoin de purgation ou de phlebotomie, & qui pis est, ilz n'ont point de consideration du temps qu'il faut cesser l'application desdits medicamens retriggeratifz, & en appliquer d'autres qui soyent resolutifz, avec mediocre calfaction & deterfion. Et certes auons veu aduenir plusieurs fois gangrene, & mortification des particules affligees, par l'indecente application desdits medicamens retriggeratifs. Parquoy le Chirurgien

prudēt doit auoir considératiō qu'il faut changer lesditz médicaments, lors que la chaleur est ostée, & la rougeur diminuee, puis appliquer médicaments tels qu'auons dit. Par ce moyen il procédera regulierement à la cure, & en aura honneur, & le patient vtilité, de laquelle apres en rendra grace à nostre Saluateur.

LE ONZIEME LERREVR

*est touchant la curatiō de la maladie nommee gangre-
na, ou estyomenus.*

LA maladie nommee gangrena, ou estyomenus; prouient souuent de quelque phlegmon rabtraité, lequel est situé es parties fort sensibles, du ql la maniere ne peut transpirer, & auient aussi par blessure, ou pointure fait sus les cot des & parties nerueuses, iointe avec phlegmon, ou

par trop esteindre quelque partie le-
 see ou non lesee. Et est ceste maladie
 vn des cas des plus difficiles de tou-
 te la Chirurgie, qui maine à la mort
 tous les iours plusieurs patiés. Pour
 ce faut auoir grande consideration
 sur les blessures & pointures faites
 es parties nerueuses, afin d'euitier
 phlegmó & putrefaction. Et quand
 le cas aduient que la gangrene com-
 mence, faut faite grande diligence
 touchant laditte curation, pour eui-
 ter le danger de la mort euidant, en
 faisant scarifications profondes, &
 en appliquant aydes de grande detec-
 tion & liquides, comme sont deco-
 ction, & lessiue faites avec *appium*
vulgaire abrotonum, absinthii utrumq;
centaurium, minus, gentiana, & sembla-
 bles: car nous auons tousiours trou-
 ué iceux aydes plus vtiles, q' l'appli-

NON

catiō des farines de lupins, ou orobe, qui sont emplastiques & font obstruction des porres. Et en ce cas faut observer sur tout vne chose, c'est qu'on ne doit point laisser refroidir la partie lésée avec les aydes: car la frigidité mortifie iceux: pour ce faut de quart d'heure en quart d'heure appliquer quelque linge chaud, pour entretenir la chaleur moyenne: dont par ce moyen auons acquis souuent honneur & prouffit aux patients, par l'ayde du Createur.

LE DOVZIEME ER-
reur est touchant la curation
des catarrhates.

LA curation des catarrhates, de la pierre engendree en vessie, de vngula confirmee, & de rupture intestinale ou zirbale, par chirurgie doit estre delaissee à exercer seulement

ment par ceux qui sont expérimentez en la curation d'icelles : ce non-obstant auons veu cōmettre erreur plusieurs fois par ceux qui abattent les catarrhates; car contre toute raison nous auons veu les abatre en plain marché par iceux, sans purger le corps, & faire diuersion des humeurs abondans : laquelle chose a esté cause qu'vn ou deux apres lesdictes catarrhates sont remontees, ce temps pendant les operateurs se sont absentez, *accepta mercede*. Et si auons veu aucuns d'iceux operateurs abatre les catarrhates, qui n'auoyent point encore prins forme de pannicule, & passoit l'eguile à trauers de la catarrhatte, comme à trauers de lait & bouilli : pour ce en cas deuant que faire telles operations, faut premier considerer si les catarrhates sont confermees ou nō,

& si elles prouiennent de cause primitive ou non, si elles sont de couleur blanchette ou grise: ou si elles sont obscures, tirant sus le noir ou le tanné: car les premieres sont depoussables, les autres nó. Celles qui prouiennent de cause primitive sont difficiles à curer, & lors qu'on veut faire l'operation, faut purger le corps, & faire phlebotomie diuersiue, & que le patient soit à repos, tenant bon regime, & que la teste soit bié situee en haut, bien doucement, sans agitation d'esprit. Nous auons veu commettre erreur aux operateurs, qui ont taillé de la pierre en la vessie, car apres qu'ilz ont osté la pierre, ilz ont appliqué huile de petrole, qui est fort chaud, & farine de froment avec huile commun, laquelle chose est du tout contre raison: car apres qu'on a osté la pierre, & les atenules suivantes,

nantes, on doit appliquer les choses ad-
stringentes, afin de fermer le plus
qu'on pourra la playe: autrement il
adviert souvent q le patient rend l'ur-
ine par la playe faite tout le temps
de sa vie, laquelle chose n'adviend-
roit point s'ils procédoient decen-
tement à la curation de ladite playe.

et de tout cela on se doit servir de la sorte

LE TREZIEME ERREUR

est touchant les playes de la face.

Et neines jugulaires, et de la face.

et de la face, et de la face.

Il adviert souvent que la Saphene,

qui passe au milieu de la cuisse,

en la partie domestique, est blees-

see, ou couppee, dont les patients

meurent subit, par flux de sang, par-

teillement est des veines jugulaires,

que on nomme communément ori-

ginales. Les Grecz les appellent Spha-

gittides, en ce cas, ceux qui tombent

et de la face, et de la face.

es mains de gens ignorans sont en euident danger de la mort, comme souuent auons veu aduenir, d'autant qu'ils sont negligens en tel cas, qui requiert tresgrande diligence. Pour ce le Chirurgien methodic & prudent, lors qu'il void que ladite veine Saphene est notablement blessée, il situe la partie lesce assez haut, & le genou plus haut que la cuisse, & le corps plus bas qu'iceux, & applique

Methodo. le medicamēt de Galene fait *ex thure, aloe, oui albumine*, le q̄l il applique avec plu. naceaux faits de doux poils de lieure, & fait ligature decente cōmençāt vers le genou, & finisēt vers la cuisse, en ordonnant bon regime au patient, & faisant diuersion ainsi que le cas le requiert. La playe faite es veines jugulaires est encore plus dangereuse que celles d'essusdittes, pour ce est besoïn de faire plus grā-

de diligence qu'en icelle, & ou il ad-
vient qu'elle est blessée notablemēt,
les patiens viennent le plus souuent
à mourir avec grand flux de sang,
neantmoins le Medecin Chirurgien
doit procéder à la cure par methode
faisant diligence extreme, comme
auons fait plusieurs fois, notammēt
en la personne de l'hoste de saint
Julian a Arras, qui auoit esté blessé
d'vn couteau au col, & la veine iu-
gulaire notablemēt blessée, telle-
ment qu'il estoit deploré, à cause que
par aydes communs ne fut possible
desister le flux de sang, lequel fut de-
liuré de tel danger par l'application
du medicament dessus nommé, en
le tenant à tout le doit subiect, &
moyennemēt comprimé par l'espa-
ce de quatre iours, sans interposer
quelque temps, & par ce moyen en
a esté seuremēt guarý, dont en rend

souuent graces au Createur, lequel par l'ayde de la Chirurgie l'a deliuré du danger de la mort.

LE QUATORZIEME ER-

reur est touchant ceux qui usent de *bons sortileges, enchantemens, ou de certains du conseil du diable fait par un milier.*

L regne en plusieurs lieux des erreurs execrables, touchât ceux qui par parolles ou sortilege, ou par enchantemens veulent guerir toutes maladies, lesquelz abusent souuent le peuple, à cause qu'itz se vantent de faire merueilles, & maintent à la mort plusieurs, qui sont bien guerissables, & tous sont vrays homicides, comme souuent nous voyons. Pour ce telles gens doyuent estre expulsé hors des pais, & fuis comme vne peste de la Republique Chrestienne:

& pareillement les Empiriques. Autrement si les Gouverneurs des villes les tolèrent, & permettent abuser les pauvres patients, ilz en rendront conte deuant Dieu. Aussi ceux qui sont commis par les Euesques, nullement ne les doyent tolerer, mais doyent vser de censures rigoureuses à l'encontre d'iceux, affin qu'ilz delaissent telz execrables sorts ou enchantemés. Ce faisant garderont l'honneur de Dieu, & feront grande vtilité aux patients, lesquels seront gueris seurement, par ceux qui sont bien instruits en la Chirurgie.

LE QUINZIEME

Erreur.

Le Quinzieme Erreur, est touchât les Empiriques, qui abusent tout le monde par leurs promesses, & sont courants de ville en autre, vendans publiquement Laurcole,

elle bore coloquinte, esula, catapuce
 & plusieurs autres medicamens ve-
 nimeux, sans estre corrigés sans pois
 & sans mesure, & sans iudice, par les
 quelz medicamens ilz font tous les
 iours mourir des gens sans nombre.
 Et combien qu'il soit euident quasi
 a chacun, que par l'vsance de telles
 choses dangereuses, soyent vrays ho-
 micides, neantmoins iceux ont tous-
 iours aucuns par les villes & citez de
 iudice peruers, qui vueillent porter
 lesditz empiriques en leurs homici-
 des & erreurs, comme auons veu en
 ceste ville & Cité d'Arras, d'un em-
 pirique, qui iamais ne congneut vn
 a, ou vn b, lequel par l'exhibition
 de precipitatum, qui est poudre de
 vis argent a fait mourir plus de soi-
 xante personnes. Et sont tous morts
 avec tresgriefz accidens, car incon-
 tinent qu'ilz ont prins ladite pou-
 dre,

dre, ont tous commencé à vomir continuellement, & quant & quant aller à chambre cinquante ou soixante fois pour le moins. Et d'iceux aucuns tomboyent en grande syncope, avec douleur intolérable des intestins & d'estomach, donc la plupart d'iceux sont tombés en disenterie, & ont iettés grande quantité de sang par la bouche & par bas. Et tous ont eu le second iour les dentz noirs, comme s'ilz eussent esté engréssez doignement, ou entre le mercure en abondance, dont les plus delicatz sont mors le second, le tiers, ou le quart iour, & ce avec conuulsion & avec les accidens terribles dessus nommez, les aucuns qui estoient vn petit plus robustes, sont morz avec lesditz accidens le septiesme, huytieme ou neuvieme iour, les autres s'ont terminéz vers le quinzieme,

zieme, seizieme iour, les autres sont demourez languissans, avec douleur continuelle d'estomach, & les dents noires comme layet. Et auons guaty plusieurs qui auoyét prins de ladite poudre par ledit empirique, en leur donnant deux fois le iour vne culieree d'huile rosat, leur faisant yser souuent du laiët de vache bouilli avec sucre rosat. Parquoy est tout certain que telz homicides doiuent estre punis urefrigueusement, par ceux qui ont l'administracion de la iustice des villes & citez, car autant est homicide celuy qui tue quelqu'vn par poison, que celuy qui tue vn homme en trahison.

LE SEZIEME ERREVR

*est encores des playes de la teste,
& de la diete des vulnerez
en icelle.*

Depuis

Depuis l'an éinquante trois que
 auons fait imprimer ce petit li
 uret à l'vtilité des patiens & Chi
 rurgiens, auons trouué que plusieurs
 Chirurgiens vulgaires commettent
 souuent erreurs es playes de la teste
 non penetrantes, leiquelz sans iudi
 ce & sans obseruation & inquisition
 des choses precedentes & requises à
 considerer en tel cas, ilz viennent à
 descouurir le *cranium*, ostant & sepa
 rant violement le *pericranium* ar
 riere de l'os, dont par la separation
 diceluy se ensuiuent des mauuais ac
 cidens, côme grand douleur, vigiles,
 fieures, conuulsions, & depression
 de *dura mater*, lesquels mainent sou
 uent les patiens à la mort. Iceux vul
 gaires Chirurgiens ignorans, que la
functiõ dudit *pericranium* est neces
 saire à la vie, d'autant qu'il soustient
 le *dura mater*, & par consequent le

pia mater, qui ont leur *sistole* & *diastole*, c'est à dire depression & elevation, & à trauers dudit *pannicule* à l'endroit de commissures passent nerfs, veines, & arteres, qui portent sentiment, nourrissement, & vie ausditz *dura* & *pia mater*.. Parquoy suis d'aduis, que deuant qu'on separe le dit *pannicule*, qu'on considere bien diligemment, s'il est besoing de ce faire ou nō, car les hardis folz sans discretion & raison indifferemment font grande nuisance aux pources patients, & sont souuent cause de la mort d'iceux. Et en ay veu d'aucuns, qui par avarice ont fait telle operation, affin qu'ilz eussent plus grande remuneratiō de leurs patients. Et d'auantage ay veu grād' erreur es blesez de la teste, quant à la diette, car lesdits chirurgiēs vulgaires, permettent aux patients manger & boire ce
que

que bon leur semble, laquelle chose est du tout contre toute raison, à cause q̄ entre toutes les blesses du corps humain, celles de la teste requierent plus extreme diete avec abstinence de vin & biere ou citre. Et doiuent les patients tenir chambre, & soy garder de l'air, & suis certain que par negligence d'observer ces deux choses dernieres, plusieurs viennent a la mort, qui seroyent bien guaris en gardant nostre conseil.

*Le. xvii. Erreur est touchant
la maladie des saints.*

NOus auons dit au commencement de noz aphorismes de chirurgie, qu'il n'est nulle maladie de saints, comme croient les peureux simples gens, qui sont toujours faisâs neufuaines, septaines ou quin-

zaines de diuers saints, & est certain que toute maladie de saints nous a esté induite par la legiere credulité des patiens, & par l'ignorance des chirurgiens, ou par superstition. La premiere cause a ce mouuante, a esté l'ignorance des chirurgiens, lesquels lors qu'ilz veoyent quil leur estoit impossible de paruenir a la fin pretendue, pour soy expliquer de la cure a leur honneur, ilz disoyent aux patiens, qu'ilz auoyent mal de aint. Alors les poures patiens credules adioustans foy à leurs folle excuse, & quasi destituez d'aydes humains, ont priés leur refuge aux saints & saintes, faisant diuers pelerinaiges & voyages lointains, à grand labeur & grans despens. Et a la verité, la simplessé des poures gens a suiuy souuent en ce cas les noms des saints, qui conuiennent avec les nés
des ma

dés maladies, comme ceux qui sont hydropiques, vont à saint Hydrope. Ceux qui ont la veüe empeschée, vont à saint Clair : ceux qui oyent dur, seruent saint Ouin : ceux qui ont mal aux mains, vont à saint Main. Et à la reale verité, toutes les maladies qui surviennent au corps humain, ont esté au paravât les saints. Parquoy ie veux conclure, que le chirurgien methodique doit prendre peine à cognoistre chacune maladie, par ses propres accidens : lors qu'il aura cõgnissance d'icelle doit par raison & methode traiter ses patients, & lors qu'il congnoistra que quelque maladie sera incurable, il en fera certain pronostique, & par ainsi evitera toute calomnie : combien que ie ne veux nyer que quand quelqu'un est oppresse de quelque maladie, qu'il ne doive implorer l'aide

des saints ou saintes, apres qu'ils ont requis en vraye foy l'ayde de Dieu tout puissant, moyennant qu'il ny ait aucune superstition, en preferant tousiours l'honneur de nostre Redempteur & Seruateur à toute chose.

LE XVIII. ERREUR

est touchant l'application des

sanctes.

ON ne doit point appliquer sanctes sur corps humain, que les choses vniuerselles ne soyent decemment obseruees, & que le corps ne soit preparé & purgé premier, faisant election desdites sanctes, avec preparation d'icelles. Autrement suruiennent souuent grans accidens es corps ou on les applique, comme auons veu aduenir en la personne du noble & vertueux Cheualier le seigneur d'Auffimont, que Dieu absolue,

solue, en sont temps Capitaine de Ba-
 paumes, lequel ayant aucuns petis
 vlceres aux iambes, fait appliquer
 par son chirurgien sept ou huit san-
 sues sur les iambes, sans aucunes di-
 uersions ou euacuations des humeurs,
 lesquelz estoient abondans en sa per-
 sonne. Et lors que lesdites sansues eu-
 rent tiré du sang competamment, &
 ce apres auoit fait bonne chere, il
 perdit bien six ou sept liures de sang,
 lors combat en Icteria & Ebullition
 d'humour coletique, *quia sanguis est
 frenum cholerae*. Peu de temps apres
 la fièvre double tierce luy survint &
 d'icelle vint subit en Hydropisie in-
 curable (*quia qui qualido sont hepate
 si in ascitem incidant, omnes fere sunt
 deplorati.*) Dont peu de temps a-
 pres ledit Seigneur termina sa vie
 au grand regret de tous les pays
 d'embas, principalement de ses sub-

ietz & voy fins limitrophes, a cau-
 se de ses vertus & gestes Cheua-
 lereux, jointz avec grande pruden-
 ce & diligence. Il estoit fort vigilant
 & laborieux, comme vn Herculet,
 modeste & humble en son parler, li-
 beral & receuant tous gens de bien
 comme feroit vn prince. Et quand
 il estoit besoing d'assaillir ceux qui
 faisoient grief au pays, il se mon-
 stroit hardy, comme vn Hector de
 Troye: & quand il auoit prins au-
 cuns prisonniers. il les traittoit fort
 humanement, & les reuoyoit souuēt
 sans rançon. Plusieurs ont esté ren-
 uoyez par luy sur leur foy, & com-
 bié quil se soit souuēt trouué en plu-
 sieurs conflicts, estarmouches, & au-
 tres actes de guerre, en repoussant
 ses ennemis virilement, Dieu luy a
 fait ceste grace quil ne fut iamais pri-
 sonnier, combien que plusieurs a-
 uoyent

uoy et grand desir de le surprétre, fut par voye obliq, ou directe, en quoy on à cogneu la grande prudéce, ioincte avec la hardiesse d'icelluy: & s'il failloit narrer les actes vertueux & cheualereux qu'il a fait, faudroit vn liure particulier, comme on a fait en France du cheualier Bayart, en son temps gouuerneur du D'aulphiné, & Capitaine general pour le Roy de France de la les Mons. Le predic seigneur d'Auffimont, ne voulat iamais auoir reputation de surprétre ville ou Cite par cautelle ou par trahison, cognoissant que c'est grand deshonneur a ceux qui ont l'audace de commettre cas tant exécration, & qu'il en faut rendre compte deuant Dieu. Il estoit misericordieux aux pourceus, portant grand reuerence aux saintz sacrements de l'Eglise, par quoy pouués estimer qu'il est pour

le present du nombre des bienheureux regnant au ciel avec ceux qui ont suiuy la voye de vertu.

LE XIX. ERREVR SERA
 un petit epilogue, touchant les souldats
 & ceux qui ont administration
 d'un camp en temps de
 guerre.

IL aduient souuent que le mau-
 uais gouuernement que tient la
 gendarmerie en vn camp, est cause
 de la peste, & plusieurs autres mala-
 dies contagieuses: raison, qu'ilz sont
 nourris de chairs mal preparees &
 mal cuites, & que les caves sont ga-
 stees & infectees, a cause que en i-
 celles on iette plusieurs bestes mor-
 tes, plusieurs tripailles & excremens
 d'icelles. Parquoy, quiconque est
 mareschal d'un camp, y doit preu-
 dre garde, faisant commandement

aux bouchers d'enterrer lescites tri-
pailles & les cheuaux mortz, à cause
qu'ilz ne corrompent point seule-
ment l'eau, mais gastent & infestent
l'air, duquel la corruption engendre
la peste & autre maladie contagieu-
se. D'auantage lescites maladies
viennent souuent en vn camp par
diuine permission pour punir les pe-
ches de la gendarmerie, laquelle of-
fense souuent la diuine maiesté par
blasphemes & iuremés execrables,
par homicides, pilleries, oppressions
des pources gés des villages, yurôgne-
ries, fornications, adulteres, & plusi-
eurs autres grieues offenses de la ma-
iesté diuine, laquelle souuent punit
fort rigoreusement ceux qui se de-
stent a mal faire, qui prouoquent l'i-
re de Dieu sur eux: pourcé selon mō
petit iudice, on doit garder vn camp
sans immondice, & le plus nettemēt

qu'il est possible, afin que l'eau & l'air ne receuent infection ou corruption, & la gendarmerie doit euiter les pechez dessusditz, & suyure le chemin de vertu & d'honneur.

Pour la conclusion de ce petit liure, nous mettrons seulement vn remede, q'a esté trouue fort vtil, contre la peste en cest An 1557. Lequel se doit practiquer en ceste sorte. Lors que on voirra, que quelcun sera touché de la peste, & qu'il s'apparoistra quelque signe d'icelle, soit aposteme, au brax ou quelque autre pustule, s'il est possible on fera le plus tost que on pourra la phlebotomye selon ce que auons mys par escript. Et dix ou douze heures apres on donnera au patient la quantité de demye dragme de calchitis, que

on nôme vulgairement vitriol blâc,
ou copperos blanc mis en trois pilu
les formees avec vn petit de gomme
Arabic, lesquelles on donnera en y
uer avec mithridat & en esté avec
demie culteree de Syrop de grena
de ou de ius de citron, & ne doit le
patient ne dormir ne manger de
troys heures apres, & s'il ne peut e
stre saigné, il ne doit point laisser de
prendre ledit remede. Par l'vſance
de ce remede plusieurs ont euadé le
danger de la mort, à l'aide de nostre
Seruateur Iesus Christ, auquel
ſoit donné gloire & louenge
à tout iamais.

Amen.

* * *

F I N.

**Imprimé à Lyon, Par
François Durelle.**

1570.

FIN.